


陝西通志



第六十二卷

人物八

孝義

DS
793
S45S5
1735
v.62

陝西通志第六十二卷

人物八

孝義

周

張仲吉甫之友其性孝友

詩箋○按小雅皆周西都時所作而六月一篇其末章云來歸自鎬飲御諸友侯誰

在矣張仲孝友則仲必家於西周者也故取以冠孝義之首

漢

萬石君石奮其父趙人也高祖召其姊為美人徙其家長安中奮孝文時官至大中大夫無文學恭謹舉無與比孝景即位徙奮為諸侯相奮長子建次甲次乙次慶皆以馴行孝謹官至二千石景帝號奮為萬石君萬石君歸老於家過宮闕必下車趨見路馬必執焉子孫為小吏來歸謁萬石君必朝服見之不名子孫有過失不

誚讓爲便坐對案不食然後諸子相責因長老肉袒固謝罪改之
乃許子孫勝冠者在側雖燕必冠上時賜食於家必稽首俯伏而
食如在上前其執喪哀戚甚子孫遵教亦如之建元二年建爲郎
中令慶爲內史建每五日洗沐歸謁親入子舍竊問侍者取親中
裙廁牘身自澣洒復與侍者不敢令萬石君知之以爲常建奏事
於上前屏人乃言極切至廷見如不能言者上以是貌而禮之萬
石君徙居陵里內史慶醉歸入外門不下車萬石君聞之不食慶
恐肉袒請謝罪不許舉宗及兄建肉袒乃謝罷慶慶及諸子入里
門趨至家萬石君卒建哭泣哀思歲餘建亦死慶遷御史大夫元
鼎元年以御史大夫慶爲丞相慶深審謹無他大畧後薨諡曰恬

侯

漢書
本傳

張歐字叔高祖功臣安邱侯說少子也歐孝文時以刑名侍太子然

其人長者景帝尊重常爲九卿至元朔中代韓安國爲御史大夫
歐爲吏未嘗言按人劾以誠長者處官官屬以爲長者亦不敢欺
上具獄事有可卻卻之不可者不得已爲涕泣面而封之其愛人
如此以上大夫祿歸老於家家陽陵子孫咸至大官

漢書本傳

趙都役裋人爲左馮翊馮野王部督郵掾池陽令並素行貪汙輕野
王外戚年少治行不改都案驗得其主守盜十金罪收捕並不首
吏都格殺並家上書陳寃事下廷尉都詣吏自殺以明野王

元龜

云敞字幼孺平陵人也師事同縣吳章章治尚書爲博士平帝年幼主
莽秉政帝母及外家衛氏皆不得至京師莽長子宇非莽鬲絕衛
氏恐帝長大後見怨與吳章謀夜以血塗莽第門若鬼神之戒冀
以懼莽章欲因對其咎事發覺章坐腰斬磔尸陳市門初章爲當

世名儒教授弟子尤盛莽以爲惡人黨皆當禁錮不得仕宦門人盡更名他師敞時爲大司徒掾自劾吳章弟子收抱章尸歸棺斂葬之車騎將軍王舜高其志節表奏爲掾薦爲中郎諫大夫莽篡位擢爲魯郡大尹更始時安車徵敞爲御史大夫免病去卒於家

漢書本傳

龍伯高敦厚周慎口無擇言謙約節儉廉公有威

馬援與兄子書

伯高名述

京兆人爲山都長由此擢零陵太守

後漢書馬援傳

宣秉字巨公馮翊雲陽人也少修高節顯名三輔哀平際見王氏據權專政遂隱遁深山州郡連召常稱疾不仕及莽篡位遣使者徵之秉固稱疾病更始即位徵爲侍中建武元年拜御史中丞明年遷司隸校尉務舉大綱簡畧苛細秉性節約常服布被蔬食无器帝幸其府舍見而嘆曰楚國二龔不如雲陽宣巨公四年拜大司

徒司直所得祿俸輒以收養親族其孤弱者分與田地自無擔石之儲六年卒於官除子彪爲郎

後漢書本傳

王丹字仲回京兆下邳人哀平時仕州郡王莽時連徵不至家累千金隱居養志好施周急每歲農時輒載酒肴於田間候勤者而勞之其墮嬾者恥不能致丹皆兼功自厲邑聚相率以致殷富其輕黠遊蕩者輒曉其父兄使黜責之沒者則賻給親自將護鄉鄰以爲常行之十餘年風俗以篤丹資性方潔疾惡豪強時同郡陳遵大俠也欲結交於丹丹不許前將軍鄧禹西征關中軍糧乏丹率宗族上麥二千斛禹表丹領左馮翊稱疾不視事後徵爲太子少傅客初有薦士於丹者因選舉之後所舉者陷罪丹坐免客慙懼自絕尋復徵爲太子太傅乃呼客謂曰子之自絕何量丹之薄也不爲設食以罰之相待如舊其後遜位卒於家

後漢書本傳

常彪字孟達平陵人彪孝行純至父母卒哀毀三年不出廬寢服竟

羸瘠骨立異形醫療數年乃起好學洽聞建武末舉孝廉除郎中

以病免肅宗即位徵爲左中郎將長樂衛尉數陳政術歸於寬厚

乞骸骨拜爲奉車都尉建初七年車駕西巡以彪行太常從彪因

建言今西巡宜追錄高祖中宗功臣紀其子孫帝納之還拜大鴻

臚是時陳事者言州郡貢舉率非功次詔下公卿議彪曰國以簡

賢爲務賢以孝行爲先求忠臣必於孝子之門士以才行爲先不

可純以閥閱彪因盛夏多寒上疏諫曰當暑而寒殆刑罰刻急所

致天下樞要在尚書宜簡嘗歷州宰素有名者諫議之職應用公

直之士書奏帝納之元和三年東巡以彪行司徒事從行還以病

乞身永元元年卒彪清儉好施祿賜分與宗族家無餘財

後漢書本傳

馮豹字仲文

衍子京兆杜陵人

年十二其母爲父所出後母惡之嘗因豹

寐欲行毒害豹逃走得免敬事愈謹而母疾之益深時人稱其孝
長好儒學以詩書春秋教驪山下鄉里爲之語曰道德彬彬馮仲
文舉孝廉拜尚書郎忠勤不懈每奏事未報嘗俯伏省閣從昏至
明肅宗聞而嘉之使黃門持被覆豹勅令勿驚時方平西域以豹
有才謀拜爲河西副校尉和帝初數言邊事遷武威太守視事二
年河西稱之復徵入爲尚書永元十四年卒

後漢書
馮衍傳

趙宣字子雅南鄭人出自寒微溫良博雅太守犍爲楊文方深器異

之遂察孝廉官至犍爲太守

漢中士
女志

張奮字穉通

純子京兆
杜陵人

少而好學節儉行義常分捐租俸贍卹宗族

雖至傾匱而施與不怠永元六年爲司空時歲灾旱乃口陳時政
之宜明日和帝錄囚徒收洛陽令陳歆即大雨三日奮在位清白
九年以病罷十三年更召拜太常上疏曰王者化定制禮功成作

樂謹條禮樂異議三事願下有司考定帝善之其冬以病罷卒於

家

後漢書
張純傳

陳綱字仲卿成固人少與同郡張宗受學南陽以母喪歸宗爲安衆
劉元所殺綱免喪往復之值元醉卧還須醒乃殺之自拘有司會
赦免三府並辟舉茂才拜弘農太守初至有兄弟相訟自責引退

後無訟者在官九年卒天子痛惜賜家錢四十萬

漢中士
女志

田輝字叔都兄字威都左馮翊人俱各純懿叔都最知名郡嘗欲察
授之輝恥越賢兄遂托病瘖人數恐灼持之有度後在田舍友人

張子平吉仲考等密共穿窬奪取衣衾窮夜獨處迫切至矣然無
聲響徒喑喑而已子平因前抱持曰謂汝避兄耳何意真然耶相

對歔歔哀動左右間積四歲威都果舉遷安定長史還歷鄉里薦

祀祖考叔都沃醊神坐頰仰因語是月司隸太尉大將軍同時

辟爲侍御史舉茂才不幸早隕威都官至武都太守太尉掾風俗通

蘇不韋字公先平陵人父謙初爲郡督郵時魏郡李嵩爲美陽令與

中常侍具瑗交通貪暴爲民患前後監司莫敢糾問謙至郡案其

臧論輸左校謙累遷金城太守去郡歸鄉里漢法免罷守令非詔

徵不得到京師後謙私至洛陽時嵩爲司隸收謙死獄中不韋時

年十八載喪歸鄉里瘞而不葬藏母武都山中變名姓盡以家財

募劍客邀嵩於諸陵間不尅會嵩遷大司農時右校芻廩在寺北

垣下不韋與親從兄弟潛入廩中夜則鑿地晝則逃伏經月達嵩

寢室值嵩在厠因殺其妾及小兒留書而去不韋知嵩有備乃飛

馳魏郡掘其父阜塚斷取阜頭以祭父墳又標之於市曰李君遷

父頭嵩憤恚發病嘔血死不韋後遇赦還家乃始改葬行喪後漢書蘇

章傳

燕邠字元侯趙嵩字伯高南鄭人陳調字元化仲卿孫也邠爲刺史
卻儉從事使在葭萌與從事董馥張引同行儉爲黃巾所殺邠聞
故哀慟說馥引赴難二子不可邠嘆曰使君已死用生何爲獨死
之牧劉焉嘉之爲圖象學宮誅馥等嵩事太守蘇固固爲米賊張
修所殺嵩痛之伏劍直入修營殺十餘人幾獲修死陳調少尚遊
俠間固死聚賓客百餘人攻脩大破之進攻修營乃與戰以傷死
漢中士女志

田真京兆人兄弟三人共議分財生貲皆平均惟堂前一株紫荊樹
共議欲破三片明日就截之其樹即枯死真往見之大驚謂諸弟
曰樹本同株間將分斫是以顛顛是人不如木也因悲不自勝不
復解樹樹應聲榮茂兄弟相感合財寶遂爲孝門真仕至大中
大夫吳均續齊諧記○按田真舊志及續文獻皆作隋人今考梁吳均續齊諧即載此事而晉陸機詩亦云三荊歎司朱則真之弟

隋者訛也

鮑出字文才新豐人少遊俠興平中三輔亂出與老母兄弟五人家
居留其母守舍相將行採蓬實爲母作食噉人賊數十人掠其母
以繩貫其手掌驅去出怒攘臂結衽追賊賊共布列待之出斫賊
四五人賊走復合聚圍出出跳越圍斫之又殺十餘人賊連擊出
不勝乃問出曰卿欲何得出責數賊指其母以示之賊解還出母
比舍嫗遙望求哀出復斫賊賊謂出曰已還卿母何爲不止出又
指求哀嫗此我嫂也賊復解還之出得母還遂相扶持客南陽建
安五年關中始開出北歸母不能步行以籠盛其母獨自負之到
鄉里士大夫嘉其孝烈州郡辟召出出曰田民不堪冠帶青龍中
母年百餘歲乃終出時年七十餘行喪如禮

魏畧勇俠傳

脂習字元升京兆人中平中除太醫令天子西遷及詣許昌習常隨從與少府孔融親善融被誅許中百官與融親善者莫敢收恤習獨往撫而哭之太祖欲理之以事直見原後見太祖陳謝太祖呼其字曰元升卿故慷慨至黃初詔欲用之以其年老賜拜中散大

夫還家

魏畧純固傳

劉殷字長盛新興人七歲喪父哀毀過禮曾祖母王氏盛冬思堇殷哭禱澤中遂獲堇又嘗夢人告以西籬下有粟掘之得粟十五鐘銘曰七年粟百石以賜孝子劉殷弱冠博通經史性倜儻有濟世志齊王攸及羊祜皆辟之以供養無主辭不赴妻張氏亦婉順事王母盡孝王卒殷夫婦毀瘠幾至滅性齊王問辟爲大司馬軍諮祭酒轉拜新興太守甚有政能永嘉末沒於劉聰有七子五子各

授經一子授太史公一子授漢書北州之學殷門為盛以壽終

晉書本傳

南齊

曾康祚扶風人有至性母患乳癰諸醫療不愈康祚乃跪兩手捧癰
大悲泣母即覺小寬因此漸差人以其有冥應康祚位至屯騎校

尉南史解叔謙傳

梁

韋正字敬直

放弟京兆杜陵人

起家南康王行參軍稍遷至中書侍郎出為

襄陽太守初正與北海王僧孺友善及僧孺為吏部尚書郎參掌

大選賓友故人莫不傾意正獨澹然及僧孺擯廢之後正復篤素

分有踰曩日論者稱焉歷官至給事中黃門侍郎

梁書韋叡傳

韋愛字孝友

叡族弟京兆杜陵人

沉静有器局少而偏孤事母以孝聞素性清

介不妄交遊篤志好學每虛室獨坐遊心墳素而埃塵滿席寂若無人及長博學有文才尤善周易及春秋左氏袁顗爲雍州刺史辟爲主簿遭母憂廬於墓側負土起墳高祖臨雍州聞之親往臨弔服闋引爲中兵參軍義師之起也以愛爲壯武將軍時京邑未定雍州空虛魏興守顏僧都等據郡反愛沉敏有謀素爲州里信服乃推心撫御曉示順逆兼率募鄉里得千餘人與僧都等戰大破之百姓乃安蕭穎胄之死也和帝徵兵襄陽愛從始興王憺赴焉先時巴東太守蕭瓚已西太守魯休烈舉兵來逼荊州愛以書諭之瓚即日請降高祖受禪進號輔國將軍尋除寧蜀太守西上襲劉季連行至公安道病卒贈衛尉卿子乾向官至鍾離汝陰二

郡太守

梁書章叡傳

吉弼字彥霄馮翊蓮勺人幼有孝性年十一遭母憂水漿不入口殆

將滅性天監初父爲原鄉令爲奸吏所誣逮詣廷尉其父理雖清白恥爲吏訊乃虛自引咎罪當大辟玃乃撾登聞鼓乞代父命廷尉蔡法度厲色問玃曰爾求代父死爾孺童志不及此必爲人所教若有悔異亦相聽許玃曰囚雖蒙弱豈不知死可畏憚顧不忍見父極刑所以內斷胸臆委骨泉壤此非細故奈何受人教耶法度知玃不可屈撓乃更和顏誘之曰主上知尊侯無罪行當釋亮今若轉辭幸父子同濟玃對曰囚父必正刑書故思殞仆冀延父命瞑目引領以聽大戮玃初見囚獄掾備加桎梏法度矜之命脫其二械玃弗聽曰玃代父死死罪之囚唯宜增益豈可減乎竟不脫械法度具以奏聞高祖乃宥其父丹陽尹王志欲於歲首舉充純孝玃曰父辱子死斯道固然若玃當此舉則是因父買名亦何甚辱拒之而止年十七應辟爲本州主簿出監萬年縣攝官期月

風化大行後鄉人裴儁連名薦盼以為孝行純至明通易老勅付太常旌舉盼初因父成悸疾後因發而卒

梁書本傳

北魏

韋儁字頴超

範子京兆杜陵人

早有學識少孤事祖母以至孝間性溫和廉

讓為州里所稱太和中襲爵歷位都水使者子子粲字暉茂齊王蕭寶夤引為主簿轉叅軍寶夤反子粲與弟子爽執志不從相率逃免雍州平賜爵長安子子粲兄弟十三人並有孝行居父喪毀瘠過禮負土成墳弟榮亮字子昱博學有文才德行仁孝為時所重歷諫議大夫衛大將軍子綱字世紀有操行才學開皇中位趙州刺史有子文宗文英並知名

北史韋閔傳

韋休之

崇子杜陵人

貞和自守未嘗言行忤物歷位給事中安西將軍光

祿大夫子道遠中山太守道建東閣祭酒

北史韋閔傳

王訓

辯祖馮翊蒲城人

以行商致富魏世嘗出粟助給軍糧為假清河太守

隋書王

辯傳

寇治字祖禮

祖訓弟馮翊萬年縣人

自洛陽令稍遷鎮遠將軍東荊州刺史兄

弟並孝友敦睦白首同居父亡雖久而猶於生平所處堂宇備設

幃帳几杖以時節開堂列拜垂淚陳薦若宗廟然吉凶之事必先

啓告遠出行反亦如之世宗末遷前將軍河州刺史時蠻反於三

鵠治為都督追討戰沒贈雍州刺史昌平男

魏書寇讚傳

楊元就

仲宣子弘農華陰人

幼而俊拔收捕時年甫九歲牽挽兵人曰欲害諸

尊乞先就死兵以及斫斷其臂猶請死不止遂先殺之永熙初贈

汝陰太守

北史楊椿傳

皇甫徽朝那人寓居漢中仕梁安定畧陽二郡守隨其妻父夏侯道

遷入魏道遷別上勲書欲以徽爲元謀徽曰創謀之始本不關預
雖貪榮賞內媿於心遂拒而不許梁州刺史羊靈祐重其敦實表
爲征虜府司馬卒

北齊書
本傳

陸政性至孝其母吳人好食魚北土魚少政求之常苦難後宅側忽
有泉出而有魚遂得供膳時人以爲孝感所致因謂其泉爲孝魚

泉

周書陸通傳○按續文獻云陸政吳郡
人祖載從宋武帝平關中遂居長安

秦族洛川人祖白父翟並有至性聞於閭里族性至孝事親竭力爲
鄉里所稱父喪哀毀過禮每一痛哭酸感行路既以母在恒抑割
哀情以慰母意四時珍羞未嘗匱乏與弟榮先復相友愛尋而其
母又沒哭泣無時終喪之後猶蔬食不入房室二十餘年鄉里咸
嘆異之其邑人王元達等上其狀有詔表其門閭榮先亦至孝遭

母喪哀慕不已遂以毀卒邑里化其孝行世宗嘉之贈滄州刺史

周書本傳

隋

于宣道字元明

義子京兆高陵人

素性謹密不交非類以父功賜爵安成縣

男高祖為丞相引為外兵曹尋拜儀同及踐祚遷內史舍人進爵為子丁父憂水漿不入口者累日獻皇后命中使敦諭歲餘起令視事免喪後六歲遷太子左衛副率進位上儀同卒年四十二

于義傳

薛濬字道贖

曹弟夏陽人

少孤養母以孝聞好學有志行天和中為新豐

令開皇中歷尚書虞部考功侍郎帝聞濬事母孝以其母老賜輿服几杖當世榮之後其母疾病濬親甚憂瘁親故弗之識丁母艱歸葬夏陽時隆冬極寒濬哀經徒跣冒犯霜雪自京及鄉五百餘

里足凍墮指創血流離朝野爲之傷痛尋起令視事上見其毀瘠
過甚爲之改容濬竟不勝喪病卒文帝爲之屑涕使齋冊書吊祭
濬性清儉死日家無遺財子乾福武安郡司倉書佐

北史
薛辯傳

史永遵武功人與從父昆弟同居大業中賜物一百段米二百石表

其門閭

隋書
帝紀

唐

宋興貴萬年人累世同居躬耕致養至興貴已四從矣高祖聞而嘉
之武德二年詔表其門閭蠲免課役

舊唐書
本傳

田伯明涇陽人少孤伯母劉撫育伯明恩義甚篤劉以壽終伯明廬

於墓側負土成墳齋居菜食

冊府
元龜

王隴德馮翊人王藏仁蒼頭也藏仁父母先沒未合葬既而從役物
故其妻孀居旁無親屬隴德迎致其屍并其父母而葬之因廬其

墓次負土成墳每有白雉飛鳴墳上

冊府元龜

王瞿曇鄭人事親以孝養聞塋祖父母及伯父皆負土成墳三年乃畢母終亦如之晝夜悲號頭髮盡落形體枯悴墓門三年不掩夜嘗寢於棺側服終之後仍不離墓焉

冊府元龜

王燾

珪孫
郢人

性至孝為徐州司馬母有疾數從高醫遊遂窮其術因所

學作書號外臺秘要討繹精明世寶焉歷給事中鄴郡太守治間

於時

唐書王
珪傳

周智壽同官人其父永徽初被族人安吉所害智壽及弟智爽乃候安吉於途擊殺之兄弟相率歸罪於縣爭為首謀官司經數年不能決鄉人或證智爽先謀竟伏誅臨刑神色自若顧謂市人曰父讐已報死亦何恨智壽頓絕衢路流血遍體又收智爽屍舐取智爽血食之皆盡見者傷焉

舊唐書
本傳

徐元慶下邳人父爽為縣尉趙師韞所殺元慶變姓名為驛家保久

之師韞以御史舍亭下元慶手殺之自囚詣官

唐書張琬傳

元讓武功人擢明經以母病不肯調侍膳不出閭數十年母終廬墓

次廢櫛沐飯菜飲水咸寧中表闕於門永淳初巡察使表讓孝悌

卓越擢太子右內率府長史歲滿還鄉里人有訟皆詣讓判中宗

在東宮召拜司議郎入謁武后謂曰卿孝於家必能忠於國宜以

治道輔吾子尋卒

唐書本傳

李迥秀字茂之

大亮族孫涇陽人

及進士第調相州叅軍轉員外郎累遷鴻

臚卿拜兵部尚書卒年五十贈侍中迥秀母少賤妻嘗詈婢母聞

不樂迥秀即出其妻或問之答曰娶婦要欲事姑苟違顏色何可

留武后嘗遣內人候其母或迎致宮中所居堂產芝草犬乳鄰

中宗以為孝感旌大門閭

唐書李迥秀傳

崔沔京兆長安人自博陵徙關中世爲著姓沔醇謹口無二言事親
至孝博學有文詞初應制舉對策高第俄被落第者所援則天令
重試沔所對策又工於前由是知名累遷祠部員外郎當官正色
未嘗撓沮睿宗時徵拜中書舍人時沔母老疾在東都沔固請開
官以申侍養改虞部郎中開元七年爲太子左庶子母卒哀毀逾
禮常於廬前受弔謂人曰平生非至親者未嘗升堂入謁豈可以
存亡變禮中書令張說數稱薦之服闋拜中書侍郎尋出爲魏州
刺史奏課第一徵還分掌吏部十銓事以清直歷秘書監太子賓
客沔善禮經朝廷每疑議皆取決焉卒年六十七贈禮部尚書

舊唐書

書本傳

李孝孺安康人高宗時封遂寧郡公辭歸養親

明一統志

第五峯

琦子長安人

以孝著旌表其門

舊唐書第五琦傳

馮猛將邠州新平縣人居喪以孝聞慶雲見桃杏冬結實詔有司旌

表其門

冊府元龜

賈會京兆華原人有高節嘗稱疾不答辟署里中號一龍親亡負土

成墓廬其左手蔣松時號關中曾子卒縣人私諡曰廣孝徵君

唐書

賈循傳

張阿九京兆人母疾阿九割股肉饋之厥疾遂愈京兆府奉天縣人

趙正言母病割股肉以餌母疾瘳賜物五十段以資孝養華原人

韓難陀父亡廬於墓側凡十六年華陰人韓思訥六代同居詔特

旌其門奉天縣百姓滑清泌父茂先疾亟清泌割右股肉方圓二

寸與父食之病乃痊詔清泌宜與官以旌孝道

冊府元龜

李貞古南鄭人肅宗寶應元年梁州刺史臧希讓上言貞古孝行彰

聞請付所司旌表從之貞古六歲而孤母欲改嫁貞古兩泣留之

母遂守志母未食寢貞古不食寢及母亡負土成墳廬於墓側有

猛虎馴於廬前白鼠見於墓門村人異之

冊府元龜

郭曜

子儀子華州人

性沉靜姿貌瑰傑累從節度府辟署至德初推子儀功

授衛尉卿累進太子詹事太原郡公子儀尋征伐曜留治家事少

長無間言諸弟或飾池館盛車服曜獨以簡朴自處子儀罷兵遷

太子少保昆弟六人共制拜官子儀薨以遺命簿上四朝所賜名

馬珍物德宗復賜之乃悉散諸弟居喪以禮疾甚或勸茹葱薤終

不屬口建中三年卒贈太子大傅諡曰孝

唐書郭子儀傳

董思寵櫟陽縣人大曆七年京兆府上言思寵五代同居子孫凡八

十餘人友愛敦睦鄉里稱之天寶末寇盜剽掠村閭此家獨全年

遭水旱此家獨免至於征税每先於人伏望旌表門閭編諸史冊

許之

冊府元龜

帝弘京兆人葬父母廬墓次廬前生芝草七十餘莖見者以為孝感

詔免其課續文獻通考

董龍蓋屋人家貧與里人共祠社眾買牲牢龍撰文以祭祭畢分胙

久之眾不平逐出龍龍造祀飯以祭祭畢泣於樹下將焚文有白

鼠銜文入地穴掘之獲白金龍不自私率眾首官縣令賢之奏表

其間曰義夫續文獻通考

杜式方字考元佑子京兆萬年人以蔭授揚州叅軍事再遷太常寺主簿考

定音律高郢稱之遷太僕卿子棕尚公主式方以右戚輒病不視

事穆宗立授桂管觀察使弟從郁痼疾躬為營方藥羞膳及死甚

而泣世稱其篤行唐書杜佑傳

梁悅富平人父為秦果所殺悅殺仇詣縣請罪詔以悅申冤請罪

公門流循州唐書張琬傳

郭儀鄆人割股醫母疾廖邑大夫以聞其令尹令尹聞於上上俾聚

土以旌其門時昌黎官京師曾爲鄆人對

無名氏郭儀墓辨

趙隱字大隱奉天人父存約辟署興元李絳府值軍亂方與絳燕閒吏報賊至絳麾存約使去對曰荷公厚誼不當獨免即部勒左右捍之而同被害隱以父死難與兄隲廬墓幾十年闔門誦書不應辟召親友敦勉令仕會昌中擢進士第歷州刺史咸通末進同中書門下平章事中書侍郎封天水縣伯性仁悌不敢以貴權自處始布衣時家無貲與隲同耕以養雖姻宗之富未嘗干以仕宦寢顯還家易衣侍左右猶布衣也隲終宣歙觀察使既輔政他宰相及百官皆詣第升堂慶母歲時公卿必參訊懿宗誕日宴慈恩寺隱侍母以安輿臨觀宰相方率百官拜恩於廷即回班候夫人起居搢紳以爲榮僖宗初罷爲鎮海軍節度使王郢之亂坐撫御失

宜下除太常卿廣明初爲吏部尚書居母喪卒子光逢光裔光引
皆第進士歷臺省華劇光逢尤規獲自持以中書舍人爲翰林學
士時光裔由膳部郎中知制誥對掌內外命書士歆羨之

唐書本傳

康買得京兆人年十四父憲責錢於雲陽張莅莅醉拉憲危死買得
以莅趨悍度救不足解則舉錘擊其首三日莅死刑部侍郎孫革
言買得救父難不爲暴度不解而擊不爲凶宜賜矜宥有詔減死

唐書張

琬傳

爾朱達邵陽人官至御史因母居荆楚弗克迎養兄弟八人更迭定

省人以孝稱

賈志

吳仲孺商州人父病侍湯藥夜不解衣後遭父喪朝廷累起不就

官至中丞

賈志

宋

妻兒鄆縣民母劉與同里人董知政忿競知政擊殺劉氏婆兒始
十歲妹方襁褓託鄰人張氏乳養婆兒避仇徙居赦村後數年稍
長大念母為知政所殺又念其妹寄張氏與兄課兒同詣張氏求
見妹張氏拒之不得見婆兒憤怒悲泣謂兄曰我母為仇人所殺
妹留寄他姓大仇不報何用生為時方寒食具酒肴詣母墳痛哭
歸取條桑斧置袖中往見知政知政方與小兒戲婆兒出其後以
斧斫其腦殺之有司以其事上請太宗嘉其能復母讐特貸焉

宋史

李璘

惠從順京兆人十世同居詔旌表門閭

宋史許
祚傳

李仲容字儀父

濤孫萬
年人

舉進士甲科除大理評事擢御史累遷戶部

侍郎仲容性醇易喜飲酒不與物忤與人言未嘗及勢利三弟早

卒字其諸孤十餘人如已子當世稱其長者

宋史李
傳

呂君華陰人舉進士聘里中女行既中第婦家言曰吾女故無疾既聘而後盲敢辭呂君曰既聘而後盲君不爲欺又何辭遂娶之生五男皆中進士其一人丞相汲公是也

李元綱厚德錄

楊榮麟州人七世同居咸平時旌表仍蠲課調

續文獻通考

元守全京兆人五世同居請加旌表詔從之

宋史表承詢傳

李永洋州民負土成母墳芝生墳上

宋史五行志

劉靖同州郃陽縣人兄弟同居宅邊榆樹上生桑西廊梧桐上生穀

枝明年墳中白楊生檜並鬱茂鄉人號榆爲義祖祠爲小義楊爲

義孫縣令出官錢爲修三異亭

清異錄

侯可字無可華陰人篤志爲學隨計入京里中醵金贖行比還悉散其餘與同舉者曰此金鄉里所資以應詔者也不可以爲他利且行聞鄉人病念曰吾歸則彼死矣遂留不去病者瘡輟已馬載之

徒步而歸孫沔征獯猺請叅軍事奏功得官知化城縣巴俗尚鬼而廢醫娶婦必擇財可爲約束立制違者有罪幾變其習再調華原主簿富人有不占田籍而質人田券至萬畝歲責其租可晨馳至富家發積出券歸其主簽書儀州判官西夏寇邊使者使可按視即以數十騎涉夏境猝與之遇亟分其騎爲三四令之曰建爾旗幟旋出徐行夏人以爲誘騎不敢擊韓琦鎮長安薦知涇陽縣說渭源羌酋輸地八千頃因城熟羊以撫之琦上其功又議復鄭白渠得召對以微罪罷官至殿中丞卒於家年七十二可輕財樂義急人之急憂人之憂與田頌爲友頌病千里求醫未歸而頌死不瞑目可至拊之乃瞑頌無子不克葬可辛勤鬻衣卒葬之方天寒單衣以居有饋白金者顧頌之妹處室舉以佐其奩具一日自遠歸家以書告適友人郭行扣門曰吾父病醫邀錢百千賣吾廬

而不售可惻然計橐中裝畧當其數盡與之關中稱其賢

宋史本傳

張伯威大安軍人紹熙元年武舉進士調神泉尉太母黃年九十八

不忍之官黃得血痢瀕殆伯威剔左臂肉食之遂愈繼母楊因姑

病篤驚而成疾伯威復剔臂肉作粥以進其疾亦愈知大安軍羅

植即伯威所居立純孝坊事聞詔伯威與升擢

宋史本傳

師安字子仁清澗人篤信孝友家富好施幼失怙恃事外祖母三十

年生養死葬備盡其禮常刻家訓於石曰無犯非禮無妄語言勤

儉率物爲先卒贈忠訓郎改昭毅郎

賈志

張評事涇陽人五世同居男女百口總服同爨宋金兩朝勅命築義

門臺旌表宅里

續文獻通考

元

賀仁傑字寬甫鄆人父貢數從軍有功關中兵後積屍滿野貢買

金天門外爲大塚葬之後歷官總管京兆諸軍卒仁傑從世祖南征雲南北征乃顏皆著勞績居中事上知無不言言無不聽多所裨益而言不外洩帝愛重之帝欲選童女充後宮及有司買物多非土產山後鹽禁爲民害皆奏罷之特授上都留守加中書右丞其妻劉歿帝欲爲娶貴族固辭乃娶民間女已而喪明夫妻相敬如友未嘗置媵妾大德九年請老卒諡忠貞

元史本傳

李邦瑞字昌國臨潼人幼嗜學讀書通大義木華黎下諸城堡率衆來歸受旨使宋宋遣賤者來迎邦瑞叱出之宋改命行人乃如約而還太宗慰勞賜車騎因奏兵戈之際宗族離散乞歸尋訪帝諭馳驛南京尋訪親戚或以隸諸部者悉歸之後從諸王濶出經畧河南凡所歷州郡四十城繪圖以進授金符宣差軍儲使卒

元史本傳

蕭道壽興平人家貧鬻箴以自給母年八十餘道壽事養盡禮每日

候母起親侍盥櫛日三飯必待母食然後退就食至夕必待母寢然後退就寢出外必以告母許乃敢出母或怒欲罰之道壽自進杖伏地以受杖足母命起乃起起復再拜謝違教拱立左右俟色喜乃退母嘗有疾醫累歲不能療道壽割股肉啖之而愈至元八年賜羊酒表其閭

元史本傳

張閏延長縣人八世不異爨家人百餘口無間言日使諸女諸婦各聚一室爲女紅工畢斂貯一庫室無私藏幼穉啼泣諸母見者即抱哺一婦歸寧留其子衆婦共乳不問孰爲己兒兒亦不知孰爲己母也閏兄顯卒即以家事付姪聚聚辭曰叔父行也叔宜主之閏曰姪宗子也姪宜主之相讓既久卒以付聚至元二十八年旌

表其門

元史本傳

王思聰安塞人素力田農隙則教諸生得束修以養親母喪盡哀人

繼娶楊氏事之如所生以家多幼稚侵父食別築室曰養老堂奉之朝夕定省父嘗病劇思聰憂甚拜祈於天額膝皆成瘡得神泉飲之愈後復失明思聰舐之即能視縣上其狀命表異之

元史本傳

劉德奉元人父娶後妻何氏德事之如所生家貧傭工取直寸錢尺帛皆上之四弟並何出德撫愛尤篤年五十未娶稱貸爲弟求婦諸弟化其德一門藹然鄉里稱爲劉佛子

元史郭全傳

楊皞扶風人父清母牛氏牛氏病皞叩天求代遂痊如是者再後牛氏失明皞登太白山取神泉洗之復如故牛氏歿哀毀特甚葬之日大雨獨皞墓前後數里密雲蔽之雨不沾土葬畢令妻衛氏養清皞獨廬墓上負土爲墳清卒亦如之

元史本傳

李子敬陝西三原人嫁不能嫁者五十餘人葬不能葬者五十餘喪焚逋券四萬餘貫有司以名聞旌之

元史孫秀實傳

趙榮扶風人母強氏有疾割股肉啖之者三復負母登太白山禱於神得聖水飲之乃痊後年七十五卒榮號痛不食三日方飲水七日乃食粥葬之日白雲庇其墓前後十五里葬畢而散榮負土成墳廬其側終喪

元史本傳

吳好直蒲城人父歿事繼母孝兄弟求分財好直勸諭不能止即以已所當得悉推與之淡泊三十年無悔詔旌表

續文獻通考

甄城柴郁陳舜咨俱蒲城人皆能孝友以已財分讓兄弟縣令言狀

均蒙旌表

續文獻通考

吳份高陵人嘗畜牛每耕田不煩人策人策之輒觸人死子弟欲鬻之份曰是嫁毒也他日份出子弟鬻之份追客以牛性語客客遂還牛取直而去份又善折鬪訟不煩辭而人服有訟不之官而解

官聞之朝乃旌其廬曰耆德吳份門

續文獻通考

王忠三原長孫里人能盡孝道值母有疾欲爲之娶忠曰吾母疾安忍爲此後母卒廬墓日夜哀號疏食飲水人所不堪有司奏旌其

門續文獻
通考

王顯政蒲城人五世同居天曆中旌其門

元史文
宗本紀

王理蒲城人七世同居延祐天曆中表其門

續文獻
通考

張思孝華州人母喪以孝聞父疾調護甚至不愈以父涕洟半器垂

泣盡飲之復潔齋致禱乞以身代未幾遂痊至順三年表其門

元史

本傳

王士弘中部人父搏有疾士弘傾家貲求醫見醫即拜遍禱諸神扣

額成瘡父歿哀毀盡禮廬墓三年墓廬上有奇鵲來巢飛鳥翔集

終喪復建祠於塋前朔望必往奠祭雖風雨不廢也有司上其事

旌表之

元史
本傳

何從義洛川人祖良祖母李氏偕亡從義廬於墓側旦夕哀慕不脫經帶不食菜果唯啖蔬食而已事父世榮母王氏孝養尤至伯祖溫伯祖母郝氏叔祖恭叔祖母賀氏叔祖讓叔祖母姜氏叔父珎叔母光氏皆無子比其亡也從義咸爲治葬築高墳祭奠以禮時人義之

元史本傳

王克已中部人父伯通歿克已廬於墓側貊高縱兵暴掠縣民皆逃竄克已獨守墓不去家人呼之避兵克已曰吾誓守墓三年以報吾親雖死不可棄也俄兵至見其身衣裳衰經形容憔悴曰此孝子也遂不忍害竟終喪而歸

元史本傳

劉思敬宜君人事其繼母沙氏杜氏無異親母父年八十兩目俱喪明會亂兵剽掠其鄉思敬負父避於岩穴中有兵至欲殺思敬思敬泣言曰我父老矣又無目我死不足惜使我父何依乎兵憐其

孝不忍殺父子皆免於難本傳

員從政葭州人累世同居續文獻通考

劉欽字仲賢醴泉人元末兵至九峻山欽負母而逃携子與姪度難兩全以姪爲母所鍾愛謂其妻曰父母愛則愛之敢以恩奪孝爲不道之人哉投子於涇水襁母携姪而行卒脫兵患孝義聞於郡

國賈志

趙璋奉天人任安善屯丞辭職歸養素性孝友禮士周窮尤篤信義子質累官宜川白水商州龍沙宣慰使嘗遇母忌日泣曰人子於親與其祭之厚孰若養之周賈志

党榮富平諸生父冕官主事得罪戍雲南榮上疏願以身代上悅曰君親人道大倫忠孝臣子大節榮能篤大倫全大節其令應天府

速給冕引還鄉並除戍

賈志

王忠同官人七歲喪父事母以孝聞洪武三年詔旌其門

馮志

陳七兒延安人遠戍邊思母日夜號泣若風癲西地環遶不能立脚

晚見關帝跪求令騎馬尾不移時至家驚卧方甦與母會未幾母

卒終喪廬墓三年永樂十年勅立石坊旌表

延安府志

梁鑽字貫之鳳翔人大父準永樂時任石州學正聞母張氏訃音即

日徒跣抵家營葬結廬塋域朝夕哭奠時禮科給事中胡濙奉使

抵鳳聞其事造塋慰問比還奏於朝詔授湖廣鈞州知州制終赴

鈞半載以疾卒子信治家孝且嚴信子鑽以母趙邁病親嘗湯藥

侍不離席及卒勺飲不入累日葬時於墓所築垣廬居其中穴一

隙以通薪水號泣如初喪服闋而考終於西河乃出廬迎歸葬後

復居塚上前後積六載邑人咸重之稱曰梁孝子

牛澤撰梁氏世孝紀

王永綏德人都指揮僉事母喪三年不入內宣德五年旌表志

秦福邵陽人正統六年出粟千石助賑寧夏勅書建坊褒之

宰華退食錄

員宗義咸陽人慷慨有志節事繼母以孝聞敦族睦鄰輕財尚義正

統間饑宗義賑救活幾萬人

西安府志

張興咸陽人景泰五年值凶荒興施財賑窮煮粥濟饑活人不可勝

數後歲豐有來報者興竟不任

馬志

馬仲良三原人仁讓謹飭口不言人過失處鄉里犯而不校嘗有野

鴿羣集所居廬若忘機者將卒出書一編皆薦厚親戚鄰里之說

韓茹洛
撰墓表

陳於殿字伯重潼關人父歿廬墓一年值母哭夫喪明於殿即歸侍

奉湯藥晝夜禱籲極其精誠夜夢神人語曰爾母目復明矣及旦

視之果然洎母歿復廬墓李完涇陽人母病矇完時舐母目尋復

如故南續芳渭南人母失明續芳求醫禱神心力並瘁未幾母目

復明

賈志

党汝孝漢陰人同父進朝早出刈麥父爲虎噬汝孝奮力追之奪父虎口虎蹲視林中有復噬勢汝孝愈奮以石擊之負父歸治噬瘡

閱三月無恙

漢陰志

朱敬醴泉人母歿廬墓羣盜至不忍加害遺以米敬不受強留之後又至敬以所遺米作食盜乘間勸諭羣盜同聲悔過後果改行廬春渭南人母歿廬墓三年拜泣無間寒暑有盜來劫春曰我守墓者盜曰此盧孝子也遂去劉霞長武生員親喪廬墓賊至欲殺之後詢爲劉孝子賊亦感動捨去

賈志

李茂澄城人母患惡瘡茂口吮膿血及歿廬墓時暴雨如注茂懼水嚙墓伏墓而哭倏然雨止父歿亦然天順六年旌表茂二子表

表子俊皆以廬墓旌表

志

李清長安人字元潔甫十九父歿水漿不入口者數日哀毀踰禮不食肉不內處累年母病湯藥親嘗不離左右及卒哀毀幾滅性

西安

府志

劉勤字警常高陵人居喪哀毀骨立柱而後起與弟勉璉友愛甚篤璉字宗器成化末饑獨販米漢中以養二兄早孤孝思至老弗替

鄉里稱服

馬志

劉時孫高陵人事母至孝凡飲食衣服皆親試然後奉母諸弟有不恭者不形諸言恐傷母心母歿哀毀骨立人不忍見

賈志

張銳高陵人事親及二兄孝友成化末年大饑銳千里負米奉養與

族人祀先祖祭畢必男文分席會飲以施勸戒

賈志

趙謚字子安家世涇陽正統甲子鄉舉第一景泰辛未進士授主事

陞員外郎以輿論遂有江西亞叅之擢至即飛章劾少司徒及中
貴人專恣不少徇性甚孝母歿號痛幾絕廬墓側淡食草寢者八
載旦夕哭奠如初常有慈烏飛繞其旁不去兄弟以父母俱棄圖
分異謚泣止之不能則盡讓以貲產已無分毫取尤急濟人歲幾
鄉多婚葬失時者謚竭力資之成化六年卒

張有楨趙
參議墓銘

謚兄子程

以吏任驛丞亦以廬墓獲旌

馬志

張昶三原人事親色養兼備初筴鹽河東以父疾棄商攻醫飲食必
手治父所欲食必多方辦之冬月得雙鯉若神惠者父病篤嘗糞
以卜吉凶籲天願代父張目曰冥司不索我矣因汝孝延壽一紀
後果然馬理私謚曰孝莊先生

三原志

孫逢吉三原人慷慨好施率家人收穫見婦女拾遺穗者心傷之即
出已麥數石分給里中有稱貸者輒如數與之不索券時有詩云

施金不計王孫報應笑田文三窟謀人皆號爲義士

遺稿

張善治三原人舉人從父張三極廬祖墓三年時人稱孝子順孫仕

南康知府清忠多善政

賈志

杜鶴齡三原人母病甫五歲每夜籲天願代母尋愈父病不解帶者

四年夢神授以方內載海風藤詢醫人皆不省後得其藥於京邸

人咸以爲孝感學者私諡曰孝弘先生

三原志

李端宜川人父疾割股以進及卒事母羅氏愈謹母歿廬於墓側負

土築壠地高燥乏水端仰天哀籲忽泉湧於廬左成化二十一年

旌表郭敷鄜州人父喪同母廬於墓側躬自炊爨以事母下山汲

水甚艱一日墓前忽湧清泉人以爲孝感張泉雒南人張繼志藍

田人廬墓時皆有清泉湧出

賈志

陳倫岐山人年十七父官穎上適疾倫往省侍湯藥禱天願以身代

及卒扶柩歸途三千里足指破爛未嘗一乘騎俸資盡以與兄苦學不怠登成化乙未進士歷官長蘆運使致政歸衣食不繼

岐山志

馬驥漢中人爲府吏時巨寇藍鄢嘯聚鹽場勢甚猖獗莫敢撓者驥奮然効勇捧檄深入賊營宣諭利害招出賊首牛長子等一十八

名殲厥渠魁地方遂寧紀功咨用驥終不仕

賈志

熊玻涇陽增廣生年十九母病寢食俱廢湯藥身嘗母歿玻慟哭不忍遽葬浮柩於庭坐卧草土三月及葬構廬墓傍朝夕哭奠服闋歸極力養父父病至歿並如前孝負土增塋倍高疇曩朝夕溢米形容槁敗有數刼賊入廬欲生焚之玻出迎不懼賊因問玻聞爾產妹厚何悴乃爾玻曰日夕思慕不覺其他廬無長物僅有麻衣

僭解送君賊驚歎辭謝去弘治中旌表

名山藏

和鏞字宜玉涇陽人祖孟昇生珪珪嘗爲鄉貢士有孝行父歿廬墓

三年配潘氏生宣玉宣玉性仁孝於虫豸有不得所者必加憫焉
母疾宣玉求名醫診療弗愈乃取其糞嘗之語內曰吾母糞苦其
得生矣後果愈比歿哀毀逾禮既葬廬墓除服日有羣鶴飛集屋
上由是遠邇稱為褚孝子孝子毅然以文章為己任正德庚午試
於憲學冠多士是年秋登鄉舉年四十九而卒

馬谿田褚孝子墓志銘

鏞從

弟雲字民望母病日侍左右既卒終日兒啼廬於墓側朝夕哀奠
鄉人嘗遺以雞卵雲置之他所忽有牝雞來伏之成雛數十環鳴
墓側人以為異有司以聞表其閭

賈志

党淵同州人家貧善事親父歿飲水飯糲至終喪母素事績紡淵恐
其勞匿紡具慰止母終持喪哀苦每晨必爇香泣墓下同郡王尊
事母以孝聞母歿貧不克斂嚮子市棺以葬

同州志

蔚能陝西朝邑人起吏由光祿寺典簿累寺卿進禮部右侍郎在光

月
三
三
祿三十餘年未嘗持一禁鬱歸家嘗偕僚屬聯名疏請入內供
應器皿下禁獄問所由能奮曰上怒不可測能老矣不以累諸公
也獨受責降官未嘗有後言

續藏書

雷振關華陰人父邁疾勺水不入口者五日刲臂肉大如錢者三畝
藥進之明日病良已強飯徐步優游里閭者一年而卒振關廬於
墓側老屋三間上漏下穿天寒月黑悲風蕭颼振關拊膺夜哭與
嗥狐啼猿相應和鄉老白其事所司咸異之

牧齋初學集

文錦三水人夫婦持耒耕於東山積粟萬斛五子各二千石遇荒盡
施有司上其事賜壽官五世孫宏中幼有夙慧讀書一覽不遺以
恩例入太學性仁孝每食不離親側寢不離親居父卒水米不入
口者五日廬墓六年有白兔出隧之異邑人舉之御史疏旌縣官

歲給穀布

三水志

顏彩長安庠生父疾籲天願代及父歿寢苦枕塊水漿不入口者三日葬時廬墓三載所掘墳地得白金三鎰後合母遷葬其金盡用入謂孝感所致當道屢加旌表

賈志

李壯丁兒延安安定人虜大至壯丁兒從父母奔避山谷卒與遇虜縛母去壯丁兒取石擊虜母得脫前行復遇五騎一騎下馬還縛母其母呼曰壯丁兒但逃命勿顧我壯丁兒不忍手提鐵骨朶擊仆一虜母逃得生四騎圍壯丁兒斫碎之

名山藏

張友直宜川人正德時父武死武定難友直哀痛遂自殺

賈志

楊楠岐山人舉人任知縣生而重厚醇雅比長讀書究極性命動以古人自期待父兄早喪事孀母寡嫂曲盡孝敬尹霍山竟以母老乞歸母年九十病卒楠跣號慟恒勺水不入口者三日月餘竟殂

鄉人稱孝

鳳翔府志

李珍榆林衛指揮歷官叅將總督曾銑諱復河套咸寧侯仇鸞搆之棄市更誣銑子淳侵官銀械珍至京師証之珍身受五毒辭終不撓幽閉中每曰寧我死無絕曾氏後自誣銀一千兩繫獄淳得末減長流三千里鸞敗淳得於流所放歸聞者義之

延綏鎮志

張之渠字儀正華州人壬午中式癸未卒業太學以思親歸省至真定夢老父謂曰汝母疾汝宜亟行覺而大懼兼程至家母果病延醫問藥夙夜衣不緩帶母卒哀毀踰禮既殯廬居墓次雪夜伏墓哭曰吾母素畏寒吾母寒矣聞者悲之墓岡下忽有泉湧出清冽異常里中一少年素逆於父母一旦市肉以進其父異之曰吾見張孝子矣彼爲死者猶哭我親生敢不孝耶里人以是化焉竟以

墓次風寒遘疾卒

康對山撰行狀

車宗湯郃陽人字自新母病癰宗湯負之起居三十年如一日

宰莘

唐好古渭南人父癰侍湯藥不離寢席者六年

賈志

張士榮字仁亨朝邑人母韓氏苑洛子女也幼以孫育於韓有至性苑洛撫晉陽歸忽感疾坐中堂命士榮召汝祖母語士榮初不知對曰祖入耳祖母固不出也苑洛氣不屬曰我病士榮驚仆地口鼻盡血即匍匐行告祖母其祖母陡視士榮狀又聞苑洛病狀亦驚仆士榮出視祖入視祖母奔走號呼淚血滿膺食頃苑洛病蘇士榮曰果愈耶抑安我耶聞苑洛呼曰粥來乃大喜既冠補弟子員仍侍苑洛宦京邸歲丙午祖母病士榮晝夜侍湯藥命歸應秋試不行苑洛怒治裝嚴遣之士榮踞請曰祖母病而欲從事功名可乎因伏地哭苑洛亦泣聽之及病亟士榮割股肉進又嘗糞甜苦以驗瘥否卒不起士榮扶柩抵家登涉三千里暮露宿柩旁既

葬考古禮行義服三年士榮歷覽羣書尤精書易九律曆度數樂

器龜卜方藥之屬悉出苑洛指授年二十有八卒

何景明
敦倫編

韓洲長安人嘉靖間大侵賑粟百石嘗晨出見一人遺金號泣欲死

洲即如數予之子灼字以光洲患病灼割臂取血和藥以進疾旋

瘳後灼賈兩淮妻許氏事翁姑亦曲盡誠孝灼子在居母喪廬墓

三年事兄尤曲盡友敬以恩選入史館文詞雅贍爲當時所重

賈志

王之垣字伯鎮其先臨潼人避亂涇陽幼而通敏父捐館舍年方十

歲袒而號有孝童之目十四推擇爲弟子員教授里中得糈養母

豐甘中程母卧病跣步不離母訶之出則潛避戶外聲氣俱屏俟

熟睡方去病劇嘗惡驗甘苦露禱中庭請減年以益母筭歿則哀

毀骨立葬畢廬於墓左后土祠偃息攀號棗樹恹而復榮三年

如故萬曆元年貢於鄉

陳眉公
撰傳

馬理字允莊涇陽人貢入太學一夕夢母病覺心惕明日即馳歸見母果病遂養母不仕郊行得遺金坐以待頃一人號泣至爲言賣女得此養老母即與之後復周以粟父卒哀毀骨立喪葬以禮服除授蘇州吳江縣丞

賈志

趙弘祚三原人年三歲孤母李氏誓志撫之邑多伏莽值歲饑竊發弘祚方五六歲隨母避匿道遇寇欲劫其母弘祚號泣跪拜賊不可弘祚引頸披胸乞賊手中刀欲自殺以釋其母賊義之舍去稍長不樂讀書母督之泣曰家貧無以養母願爲賈母聽之賈則善賈既而有羸貲走江淮間未一年欲馳歸同賈者怪之曰夜夢阿母呼我而號是必苦憶我我心怵怵矣即歸見母母泣撫曰人傳汝溺於水余痛而呼幾不生矣汝今固無恙耶弘祚大痛曰奈何以財故累阿母自是誓不離膝下諸若飲食衣服晨昏起居率先

意而辦蓋終其身孺慕不改云

何景明
敦倫編

劉鳳岐岐山人嘉靖中任巡檢父母俱早亡祖母李氏育之成立鳳岐事李曲盡孝道李卒負土築墳風雨猛獸弗避廬於墓側一日夢李運水來家次日比鄰失火至岐舍反風火息人以為孝感

鳳翔

原案字次寮蒲城人嘉靖己丑進士官行人值父母相繼殞訃聞即日就道抵家伏柩水穀不入口者數日葬訖築室墓旁朝夕哭奠

累官戶部員外郎與富平楊忠介爵為莫逆交案姪古為沁水知縣天性敦厚素以孝稱

賈志

雷太初蒲城人幼醇謹慎取與畏法義一日昧爽偕同里數人適野

途中有偶坐者見其來走遺金一袋眾競分之太初獨不取曰非分之物得之不祥越月監司獲盜諸分金者皆為盜指誣波叔家

又皆識為其家金竟無以白斃於獄正德中縣令劉大謨以太初負鄉望辟為鄉飲賓不就親詣其家卒不赴劉甚高之年九十四

卒

何景明
敦倫編

忽麒朝邑人孝親廬墓奉旨旌表

萬姓
統譜

馬士碩扶風人事繼母如生母母病夫婦侍湯藥經年衣不解帶其母難曰雖予親子不如母年九十餘士碩亦七十餘色養愈隆

慕不已閭里合詞請表

鳳翔
府志

党中疇字易甫城固人萬曆庚戌進士初任交河知縣詢民利害力為興除障黃河得淤地甚廣人咸頌之尋考選假歸值歲饑中疇立廠煮粥活人萬計日在粥廠遂中疫死城固人為建碑紀德其以未竟其用惜之

賈志

徐以忠洋縣庠生母王早逝以忠哀痛不衰事繼母席恭謹如母兄

乾亨吏肅州坐罪其父洋隨居病故以忠隻身徑往計程四千餘里不避艱險赴肅控巡按乞免兄罪當事者憐其至性給牛車俾扶柩還葬隆慶間旌表

漢中府志

段朝綱洋縣人生甫五日喪父稍長痛父早亡事母張孝家貧傭身以供菽水母病嚙敝衣為醫藥費及歿號呼甚悲隆慶間旌表

漢中府志

府志

段廷貞澄城人嘉靖萬曆間每遇凶荒即出粟賑之孫邦進性至孝幼失怙恃事祖必體其心輕財好施尤有祖風

賈志

馬誠長安人官指揮僉事少孤事母無違母歿蔬食飲水泣血枕塊

者三年及葬廬墓又三年里人無不感悼馮恭定贈以孝弟說

賈志

樊天敘字敦夫西安諸生萬曆戊寅貢天性孝義母病篤忽思爐餅

苦厨無具者求諸里舍及歸母逝矣遂悲悼終身不食爐餅

數載人多不知年方強仕內子見背終身不再娶讀書蕭寺昕夕必整衣冠一言一動無不斤斤繩尺自少至老無少踰越卒年六

十有八

馮恭定樊貢士傳

朱蘊奇字子節西安右衛人家貧甚僦屋而居妻子織網巾爲生讀書古東嶽廟並日而食一日其子因差徭下獄會天雨四日不食氣息奄奄盡矣時嶽廟有大戶收糧者黃冠憐之因取其米爲粥以食蘊奇心知其故以爲此官米何可竊也竟不食同舍生服其節操因出其食食之蘊奇曰此可食也劉孝廉必達聞而義之白衛官始出其子於獄嘗之市途有遺網巾二其子拾之蘊奇曰彼之失猶我之失也即命其子追而還之父早喪養母盡孝母歿毀幾滅性生平苦節篤行一步不苟歿之日貧無以爲葬聞義而賻

者數百人

馮恭定朱貢士傳

許汝清咸陽人父疾籲天願代父愈汝清竟嘔血死

賈志

王應臻鄠縣人家貧買布養親歲荒養不繼潛然剪髮造其鄰易粟

食親臻與妻啖糠里人感其孝稍周之得脫於厄仇同張彥山俱

富平人賣菜養親嘗以餅魚悅親口而與妻同甘糟糠

賈志

李忍富平人家貧能孝偶獄訟當對縣役羅武朱素豪橫求忍不即

得遂繫忍母以行仍繩穿裳中辱之忍憤然曰安有辱母若此尚

可共戴天耶捶朱立死自詣縣請罪縣官寘以法直指重其行改

戍之

富平志

王一正三原人萬曆十四年出粟賑饑撫按上其事勅賜義士坊以

旌之

敦倫編

仇養蒙富平人萬曆間遇荒負米養親與妻趙氏共餽糟糠母病痢

躬侍湯藥衣不解帶父病足癰輒吮膿血親歿負土築墳廬墓六

年葷酒不茹年既八十詣親墓洒泣若孺子然崇禎三年旌表子桂芳字月賓事母至孝母病籲天求代病革或云嘗糞可知安危遂嘗之以告醫者知不可救一痛幾絕既殮乃於母卧處舐其涕唾痰涎而哭之任有川令見人有哭母者益傷其母之不逮養也

父子俱以孝稱

賈志

袁光開字德徵渭南諸生素以廉孝聞萬曆間大饑邑令憐其貧予之粟不受強之始受即呼鄰里極貧者盡賙之無何遭母喪悲號

過慟卒於柩側

渭南志

劉俊保安人父母逝泣血三年不飲酒茹葷不窺家園及葬以衾包

土築塋邱壠高聳隱若山阜萬曆中旌表

延安府志

焦復榮宜川人事親至孝萬曆間旌表李蓋延長庠生崇禎末大寇

入城蓋逃至焦孝子塋前泣曰彼人子也我亦人子也母病不能

動何偷生爲遂自縊塋樹而死

延安府志

王一清延川庠生早喪母哭泣如成人事繼母與生母等其妻劉亦

孝姑病傾奩購藥不解衣者旬日時督學校士諭諸生卷面各書

某生德行實蹟闔庠咸註一清孝行無異

延安府志

武全鳳翔人以歲貢任荆門同知事後母得其歡心兄弟中有拂母

意者即跪謝牖下達旦母悅始罷弟兄皆孝讓相成無間言

賈志

張維鄒縣庠生天性孝友父喪哀毀水漿不入口親朋以母在苦勸

維伏地痛哭終喪焉友于諸弟一錢不私人稱其難

鄒縣志

方世恩寶雞人母董氏多病迎醫侍養不遺餘力母喪三日不食三

年不爐不扇

寶雞志

董舜鳳隴州人割股療親終身廬墓同郡吳顯春親歿負土築墳四

遇虎而志不變

隴州志

彭應麟西鄉庠生家貧竭力事親父病與妻同伺左右衣不解帶父歿鬻產營葬事繼母周如生母撫其前出子女如已弟妹學使累給米帛

漢中府志

王敦直南鄭庠生事父母以孝稱母歿敦直朝夕悲慟畫已像於母像前如生時依戀狀父歿哀毀幾絕復畫墨衰像拜禮於父母像前展像則痛哭不已晨夕必問視年八十餘孺慕不衰謂之曰居憂圖同邑李一鰲官布政事親亦以孝著

賈志

李原榆林人性孝友事繼母如嫡母繼母弟青疾終夜守視坐以待旦及卒原哭之失明視青子如已子

賈志

單應錦紫陽人恩例壽官天性孝友重禮義好施與歲歉周恤獨卒年九十七歲人稱爲百歲翁孫經德萬曆己酉明經以教授終父抱沉疴號泣籲天誓以身代事繼母愉惋承順尤得歡心臺司

咸旌其門

紫陽志

趙汝珪同州人親老汝珪日奉案上食夜則視寢夏扇涼冬溫席家雖貧奉養甚盛楊誦華陰庠生事親色養備至不離左右隆冬寒夜抱父足而眠

賈志

楊天瑞同州人兄弟四人皆孝友父被蟲螫氣欲絕天瑞聞奔抱亟吮其螫處頃之甦弟天輔病危天瑞禱於神曰弟善事親尚無子急願以身代其他行類此四世共變無間言

同州志

張養中字亦中同州諸生爲人醇篤質素事王母及二親起居衣食疾病醫藥無不竭力友愛諸弟事必任勞產不居豐父嘗病痢便溲轉側必親掖扶未嘗頃刻離一夕恍惚見朱衣神握手授藥曰閔汝過苦特令汝父蚤愈比昧爽病良已後遭父喪杖而後起母歿時隆冬永夜衣麻卧草極其毀瘵甫襄事而卒人皆以死孝

之志

韓舜璿澄城人母歿寢中門之外者三年母素畏雷每遇雷作即繞墓走曰兒在此比雷止始歸同縣田占姚珊路邦進親喪皆廬墓

三年賈志

孫繩祖華下人初失怙弱冠王母歿宜承重哀毀逾禮既襄事廬於墓側者三年同州有沈時泰渭南有姚應魁臨潼有張應珮華陰有石之岱藍田有王之賈陳養心陳化龍徐明教而華州又有張

廸光皆相繼廬墓

馮恭定孝弟說

王從善蒲城人兄弟四人從善爲叔伯姒力主析居從善泣勸不從家產悉讓伯獨與仲季食力孝事二親會仲死從善營葬且爲季娶因大困率季貸貨至襄貨敗於水季亦病死扶櫬歸夜嘗露處泣守之時糧盡宿元武祠甫睡忽爲神超起聞虎嘯門外更有擲

地聲曉出有物橫闕下啓視則雜釵釧悉兼金也抵家後二年伯及姒俱亡從善爲營葬撫其養子爲畢婚治產若猶子焉事詳臨

溪公傳

賈志

樊志賢永壽人五世同居

賈志

李繼鄜州人性至孝竭力供子職父亡孝事繼母萬曆年間旌表

賈志

劉芝中部人父侃早亡母忽氏守貞芝弱冠成鄉進士官通判念母

早孀衣不華飾食不重味躬親執爨終身如一日或語及母苦節

事輒涕泣不能言赴闕陳情詔旌表

延安府志

張志尹洛川人邑諸生父應奎早卒母尚氏守志不二嘗卧疾志尹

親嘗湯藥及卒哀毀骨立歎粥三年既葬守祠廟三世同居御史

疏旌其閭

延安府志

劉爾完中部人事父母以孝聞食必親徹必請父歿水漿不入口者

七日及葬親負磚石以明經任阜平知縣母老齒俱落爾完晨昏必省命諸兒婦升堂乳母母歿葬祭盡禮松栢皆手植

賈志

李邦鎮清澗庠生淮之子淮赴試卒旅邸妻王年二十二邦鎮僅五齡王欲死殉邦鎮跪諫王始以撫孤爲念宗人謀奪王志王誓死不二邦鎮弱冠補弟子員事王益力家雖落啜菽飲水必盡其歡遇病親嘗湯藥且密禱願以身代有司以孝聞同邑廬之於家資性至孝父死於蜀匍匐乞食抵西川負骸歸葬知縣陳汝元並旌

其間

延安府志

李邦禎李邦琦葭州人俱吏員性至孝因母老不仕母病百藥不愈兩人各割股以奉母食之即愈後歿祭葬廬墓當事旌其間曰立

難苦孝

葭州志

蕭陞咸寧人拾金二鎰仍還之祖母與母歿苦次三年葬又廬墓三

年墓栢生花

賈志

任紹曾涇陽人天啓間歲饑輸粟於官躬爲賑給吏不得侵素輕財

人有稱貸不能償者常焚其券以是義聲益著

涇陽志

高愉字泰吾韓城諸生倜儻有氣節事父母至孝天啓末歲荒愉獨

產得百金悉以賑之尋以勇畧攝韓邵營事歲復荒餉不至愉多

方周恤全活甚衆軍兵不譁城堡無恙

賈志

武謨蓋厓人父陷於賊以身代死崇禎間旌表王者輔興安庠生賊

尅城執其父代父死焉

賈志

田而腴字沃千美原人以孝子稱田氏閭閻雄一邑則自孝子父御

宿先生始崇禎癸未逆成僭號脅諸紳強受之官稍抗即械繫以

輸餉爲名動累千萬御宿先生不欲屈見賊檄下孝子請代繫先

生預決其不免數諭意孝子孝子曰父不逃則陷父父子並逃則

陷宗族父子俱往俱死無益也卒行逮長安獄擊掠備至賊東行

遂挾孝子去遇害於平陽妻徐氏凶訃至哀毀踰禮棺斂皆自簡

眎七日絕粒死

陳禎年撰田孝子墓誌

臨潼庠生宋儒周父應鰲官僉事李

自成勒令輸餉儒周毅然以身代至平陽引頸受刃

賈志

王守庫扶風人少孤與弟守德事母最孝流寇亂人皆避匿守庫兄

弟以母年老不去俱被執寇怒欲殺守庫弟守德跪泣曰我有子

兄尚無後且善事母乞饒兄命願以身代守庫曰願殺我勿殺吾

弟弟在母不缺養姪不失怙兄弟爭死不已寇俱殺之同執者述

其事時麟遊庠生趙應璧奉母避賊母迫墮崖壁即於墮處號泣

死之同縣貢士楊四謙父陷於賊與第四可爭代死聞者感咽庠

生何元秀與弟敏秀兄弟捐生脫父於難

賈志

李郁寶雞學生家貧性質篤無偽少角知事母母疾朝夕不離側湯

藥必先嘗隨母食多少衣不解帶者三月遭荒歲走百里外負米以延母命母壽七十餘閭里聞之咸謂孝童

鳳翔府志

李桂芳寶雞人家貧傭作養父父卒竭力棺斂藥葬城西日哭於墓所歸則爲位哭於家一日聞母言父生時有畫像寄外遂走數百里得而事之母亡貧不能備禮亦權厝焉後稍有蓄積即營域易棺槨合葬復斬哀三年悲號幾至滅性遠近感動臺院行文表揚

鳳翔府志

葉孕秀城固人任汝州經歷母蕭氏年八十餘齋心奉釋氏孕秀偕弟孕義食則必侍疾則屢禱後因母老棄官歸修橋梁道路堰埭溝渠多損已貲溥利衆人崇禎末巨寇經擾焚毀廬舍孕秀同孕義竭力築堡避亂者生全以萬計議請旌褒固辭縣申道府題其堡曰仁里敦睦宗旌累世同居

漢中府志

陳所養洋縣人官主事致仕歸流寇壓境捐資倡衆守城賊七攻之卒不能破孟旆石泉恩貢崇禎間巨寇臨城旆同叔養氣養重弟傑倡率士卒傾貲鼓舞竭力守禦城賴以全後遇荒又勸叔養氣出粟賑饑遠近感頌縣請旌表固辭趙天一乾州人明末賊薄城下天一用火攻屢却之歲稔倡義賑饑全活甚衆

賈志

范銳邵陽人鴻臚寺序班性剛直孝友流寇犯境所過燔掠無遺銳急趨家廟護主值賊騎突至被執不屈一賊擲主地下銳罵不絕口遂遇害賊詢知素行嗟嘆悔恨久之

宰莘退食錄

劉皜然韓城人與弟閭然廬墓而處賊至不避賊相戒不入其塋曰

此廬墓孝子也

左蘿石韓城集

王端心韓城人其父母與弟死於賊亦投火死

左蘿石韓城集

楊呈芬字含蔚華陰人性至孝闖賊入關鄰里咸逃芬以母病獨不

去賊詢其故感而不殺後以母喪哀毀致疾卒

賈志

梁小槐蒲城人庚辰歲大荒有夫欲賣其婦者相持泣小槐與之粟夫婦復完聚有村翁市布得僞銀泣欲自經小槐如數予之翁得免於死一日六七嬰兒棄於道小槐携歸以粥活之明年辛巳斗粟二千錢死者狼籍小槐施米賑之全活甚衆

銅壺集

屈忠秦蒲城人性至孝母歿葬堯山忠秦結廬墓側每食必薦每薦必泣服闋復居山之清明寺晨昏登高望墓而泣如是者又三年家人促還弗許推其意殆將終身焉

銅壺集

高起鳳淳化縣生員家貧甚崇禎五年賊至掠母及妹去生詣賊營曰生父年高賴母與妹以度朝夕如必引去則生父不保賊曰得二馬贖之生得一馬至營祈請甚哀賊予其母留其妹生乃與妹訣曰我去汝即死遂持母歸賊惡之數十騎遮留生曰吾營中少

一書記汝速順我且勸汝妹當惟汝所欲生大罵曰吾讀聖賢書

作盜跖事乎賊怒撲殺之

柴菴疏集

劉篤中部庠生五歲喪母頭觸母柩啼號弗食稍長植栢墓間栢枯日對之泣泣涕著樹上樹復茂賊攻邑城陷時祖母老矣篤負之走夜犯沮水漸冰渡妻在後弗顧也父紕青門獄病方瘳夏篤侍父不解衣寢憂鬱嘔血秘不令父知父病瘳而篤隨歿

賈志

劉爾壘中部人崇禎二年盜至母驚匿爾壘時就傅於外聞變手戈

馳追叔父固止之不聽追及從者震怖莫敢前爾壘犯堅而入獨

往來賊壘間殺傷數賊尚未得母處身中大創十餘陷曲巷中兵

折力盡死焉同縣杜壽春城破時人呼之去壽春曰母老安忍捨

之遂遇害保安庠生胡國賓守城禦賊城破趨家衛其母持利刃

當門手戮二賊後賊大至死之

延安府志

梁濟民中部人家徒四壁而奉母每食必進甘旨崇禎辛巳歲大侵諸弟雖分爨必呼與俱食鄉民有既鬻妻又將自鬻濟民憐而與之食又曲爲贖夫婦相合如初舉明經不仕卒

賈志

按唐書孝友傳云唐受命二百八十八年以孝弟名通朝廷者多閭巷刺草之民皆得書於史官萬年王世貴長安嚴待封鄭縣新法汪郭士舉張長郭士度鄭迪柳仁忠能君德劉崇甘元爽韓子尚韓思約下邳張萬徹朝邑申屠思恭呂昂宜川司馬芬洛交周崇俊洛川何善宜皆事親居喪著至行者奉先張俘鄭縣王元緒寇元童皆數世同居者天子皆旌表門閭賜粟帛州縣存問復賦稅有授以官者唐時陳藏器著本州拾遺謂人肉治羸疾自是民間以父母疾多刲股肉而進鄭縣吳孝友華陰尹義華城固雍孫八或給布帛旌表門閭皆名在國史而元

史孝友傳亦云合觀史氏所載其事親篤孝者則有同官強安
臨潼任居敬華州要敬富平王賈僧華陰李寧屈秀耀州王思
天子嘗表其門閭或復其家至舊志所載明季孝義甚多往往
事蹟畧具世次難稽今亦仿各史例統敘於後廬墓則有長安
楊時敷咸陽王汝成臨潼黃仲德藍田張繼志王之賈陳養心
涇陽駱森三原張獻科藍屋王冕渭南趙是式富平孟國詔醴
泉王天秩張璉西安衛張軫膚施劉友德張信楊汝勲保安馬
忠宜川楊均仁延長徐方貢延川馬閏延安衛薛廣鳳翔石政
雷轟岐山宋仲貴王髦士封奎杜林寶雞趙一元劉守仁楊崙
郿縣高彥良麟遊何相翟孜郿邦敬汧陽王汝愚王用臣洋縣
武全西鄉焦爵鳳縣辛弘石泉魏人文漢陰劉夢龍商州劉琦
雒南張朝卿張可大姜朝周何家馮三定同州侯智雷鳳至朝

邑王於豐澄城党秉趙大治華州趙珪華陰蘇自新郭登張綱
趙乾德楊惟謨周祿蒲城雷瑜潼關藍瑄楊順通楊素通同官
習顯何源馮光升習四科乾州康衢永壽張其蘊邠州胡子淳
郭元洛川張科米脂高必升葭州姚慕虞割股則有成寧劉溥
吳光先李維新郭良才李一道彭允中線補章馬宰三原梁希
贊梁應臺富平張道治張然唐舜相王尚賢寶良棟安定景大
有岐山劉厚郿縣王瀚西鄉張淮乾州陸大端李維本永壽陳
粟鄜州武演文中部張克讓哀毀滅性則有成陽張延祚蓋厓
楊起潛辛守仁渭南薛紹慶姜鄰仲韓城衛之琚華州劉國仕
讓產則有長安李茂實渭南盧崇雅李若泰富平李廷實延安
楊汝桂沔縣李時義中部劉經發粟賑饑則有成寧王表曹恭
蒲福趙佩陳福高陵樊宗玉涇陽任紹曾張敏曹儼曹恪三原

劉祿王清楊聰渭南姜文恭陳顯蘭政王祥田雲楊茂春富平
王肅周肅魏廣膚施趙志常鳳翔梁禧岐山李存寶雞王尚忠
城固党中衡西鄉符維新王加第漢陰藍盛郭濟同州董暹
景岩王珩雷衍朝邑寇福李珩劉十九韓整雷冬邵陽車輓
國樑澄城韓泰習玉鄭鑑李守心袁忠華州王濟民耀州喬政
喬仲節同官何仕能王者爲寧希恭孟友諒孫霖陳邦彥白水
王憲劉澤永壽宋寧宋宁三水劉愷鄜州丁潤王佐中部王光
祖秦濟李達宜君田秀康允楊樹勲清澗白廷祿代輸逋賦則
有成陽許榮三原侯達先韓城党孟翰拾金不昧則有涇陽
帝閣渭南張騰蛟乾州張啓明周思聰李果永壽楊自奇漢陰
溫以良吳自強皆得列其姓名以爲修身行己者之勸焉

張大齡長安人幼失怙母黃氏守節大齡性純孝善體母心時承顏色爲欣戚少好學家貧改業岐黃母病篤百方療之復精誠籲天果獲愈子永福孫爾琬俱登賢書康熙四十一年旌表

孟學長安人幼有至性母病危遍訪醫藥日夜泣禱願減已算以增母年母遂愈時年甫十餘歲又馮選亦長安人母遭疾選不食累日潛割股和藥以進疾遂愈有司俱旌

李文秀長安人家貧以市楮爲業性至孝罄日中所得子錢悉以充養妻子衣食財足雖纖毫不私也人稱爲楮孝子

栢覆皇長安人事祖母楊總母高俱盡孝居喪有禮篤友愛撫猶子如己子康熙辛未壬申間大荒散粟八千餘石長鄠兩邑全活甚夥族黨貧乏者畀以田種除國賦外不責其償童僕給產婚娶歲終悉遣歸一門長幼七十餘人數世同居焉

張我訓長安人事母先意承志年五十孺慕不衰性喜周恤閭里
婚葬悉極力資給無德色又嘗建豐水橋行者稱便子勇亦好
施慕義有父風歲荒散賑鄉人德之

鄭仁咸寧縣人十齡喪父哀痛如成人母朱氏安貧守節仁色養
備至承歡無間雍正三年仁年踰五旬母歿廬墓三載枕塊茹
蔬未嘗一歸里舍雍正八年旌表

孫符咸寧貢生歸善令孫能寬長子喪母韓氏悲思不已每至墓
哀號竟日父病癰吮之獲愈攻苦勤學賁志早亡士林惜之雍正
八年旌表先是吳逆變起關中不靖符曾祖世選挈鄰里二
十餘家與家人同避白鹿原破產周濟皆無恙祖盛事繼母李
能孝李病籲天請代復割股和藥以進里人以爲世德

呂大猷咸寧人順治丁亥進士歷官兵部郎以母老乞終養朝夕

承歡務以悅親爲事母疾視寢視藥心力交瘁母既歿遂終身不起居鄉清介退讓不履城市咸知爲君子人也子梓生歲貢父歿時年甫十二事嫡母許生母李俱盡孝先是梓生未育大猷撫從子某爲嗣梓生體父志終身兄事之無間言舅氏任楚藩梓生將母命往謁楚民有爭財致訟者以千金求關說梓生力却之生平好讀書尤精醫術暇時以栽花釀酒爲樂郡邑檄赴賓筵皆不就鄉邦重之

楊宗明咸寧人賦性醇謹事父母尤盡孝母歿父年邁獨居宗明朝夕侍側寢食不離父再娶宗明事後母如其母父卒哀毀骨立不如葷御內者三年廉使翟鳳翥以孝行旌其門

劉祐字篤生咸寧人康熙間歲貢爲諸生試輒冠軍問業者恒接踵生平尤留心經世大務嘗立仁義社倉以賑貧民全活甚衆

蕭光蘭咸陽人事親克孝盜劫父室光蘭持挺奔鬪被數創賊遁
復饑光蘭承父志散金出粟存活千人父歿廬墓二年餘得瘞
強昇歸涕泣不已稍愈廬毀日至墓拜奠巡撫黃爾性請旌之
吳珍咸陽人幼有至性弱冠隨父渡渭父墮水時秋漲方盈珍衝
波救出見者異之有賊入室將加刃珍母珍冒死直前奪母走
得免於難值歲荒輸粟以賑里黨賴焉

劉曰銳咸陽監生事親至孝友愛昆仲至老無間素性尤樂善好
施每農時必捐給籽種以助耕耨凡閭里婚嫁疾病喪葬及族
人之流寓於咸者曰銳隨時周給未有德色康熙辛丑闢輔飢
曰銳出千金散賑全活無算雍正癸丑歲歉復出粟六百石賑
之時所居堡垣傾圯曰銳獨捐已貲五百金修築自是守望有
資晨夜無警又延塾師設義學督課里中子弟一時風尚彬彬

如也雍正十一年巡撫疏其事於

朝奉

旨給正六品職銜以示獎勵

侯治經咸陽監生早失母事父及繼母陳俱盡孝從母無子治經迎事之如所生遇鄰里婚喪必悉力資助奴婢臧獲有父母乳獨者即焚券令歸養屢值歲歉散粟散金以賑貧乏鄉人賴以全活者甚衆雍正十一年巡撫疏請議叙奉

旨以應得之缺即用

王曠鄆縣生員家貧事孀母至孝遭寇變被擄及脫歸知母死賊手一慟而絕鄰人救之經夕乃甦泣血三年聞者無不慘切

王忻鄆縣人順治初邑遭寇變賊繫忻母拷索銀幣忻挺身護母賊揮刃中其肩幾隕賊平家業蕩盡忻力田服賈奉母承祀

兄諸生慙苦貧所分已產贍之仲兄慙妻亡遺二子鞠之如己
子孝友之稱人無間言

陳調陽鄆縣生員父樓居失火調陽方弱冠冒火登樓負而下兩
人俱無恙父歿兄子遺孤輔聖方八歲季弟甫四歲調陽知母
意以幼子孤孫爲念分析家產悉推美者與之復延師課學弟
姪俱賴成立輔聖太學生性行醇厚母疾藥必親嘗衣不解帶
食息咸與母俱母亡以哀毀成疾卒

劉龍洲鄆縣人總母張氏性嚴急龍洲日侍左右畧無忤色父卒
後事之二十餘年不少衰以明經授教職兩舉鄉飲賓

王永圖字伯固鄆縣生員爲文典贍博雅性醇謹雖盛暑不去衣
冠接人無少長咸以禮居家孝友年七旬每念及二親輒痛哭
所著永思草鵲鳴杖杜編諸書皆原本至性焉

張燭鄆縣生員賀賊黑城父被執燭挺身衛父賊斫其腦而死
聶弘鄆縣人家貧以賣酒爲業有所得輒易甘脆養親肆去家遠
弘身爲傭保偶閒即歸家問父母安否雖祁寒盛暑不輟也母
故弘常宿父榻旁卧起定省家有畜犬客以餅啖之犬即啣飼
老犬人皆以爲弘孝所感

王賢鄆縣民家窘爲人傭得值養親日用無缺偶逢親舊有贈以
果餅者必懷以奉親親未入口不敢遽嘗親亡棺衾無措至典
身以葬

魏惟紫字青臣鄆縣孝子國成次子嗣嫡叔國垣後以文行選拔
授河南偃師令招來開墾設學課士多惠政時祖母年八十失
明生父母繼父母具慶悉安車迎養後以罍誤去官例得復起
念兩代高年絕意仕進奉養葬祭靡不中禮友愛昆季敦睦族

始終不倦年七十哭兄過哀以疾卒

王先身鄆縣生員賀賊陷城奉母闔門避賊卒俱斃賊

張文運藍田人八歲失怙母王氏孀居家貧歲荒竭力孝養遭寇

變負母逃匿金山日採果實奉母脩歷險艱卒保無恙母壽將及期願而歿文運哀毀逾禮既殯負土封築猶宿墓不忍去嘗另建一室顏曰永思堂鄉人過者皆興孝思雍正六年旌表

姜士珍涇陽人母孫氏早逝繼母楊性多恚且私其前子女百計苦之士珍怡然順受無怨懟色里人憐之欲訴其母於官士珍號泣挽留得不訴楊知而自悔愛如已出撫軍雷興題旌

李天牖涇陽人性孝友母病痢嘗糞知不起每夕跪誦孝經禱天願以身代母歿事父尤盡孝兄年邁苦貧仍迎養於家業師文某居三水歲稔嘗負米百里以贍之至於還遺金拒奔女焚宿

券尤多隱德雍正八年旌表

李長獃字丹馥涇陽諸生事親至孝母劉得痿痺疾長獃侍藥餌十載每至徹旦家不甚豐而好施予念友乏嗣助資納妾鄰人有逋官錢者將鬻妻長獃代償之他如施藥捐棺賑粟焚券幾於歲以爲常

陳振烈涇陽諸生天懷孝友居母喪家貧未葬日寢處柩側盡哀服闋時年未三旬鬚髮盡白事父及後母曲盡孝養性嗜學博覽羣書子焯以進士令漳平封振烈如其官

熊鈔涇陽歲貢生性孝友母劉常負疴藥餌鮮效遂究心盧扁母症獲痊後母喪泣血而歿聞者皆爲雪涕一時如三原王維圻安定南弘緒麟遊魏蔡華州張延統中部馬佶皆以親喪哀毀成疾卒弘緒康熙癸巳進士蔡歲貢生延統舉人福安知縣

諸生維圻年甫弱冠事母尤有至性

焦之雅字大雅三原人中丞源溥長子爲人方正嫻於禮儀逆聞破關父被執罵賊死之雅與弟之夏尋父屍衣衰經手持利刃誓不得遺骸必死之果得尸負歸葬畢棄家隱華山憤鬱而死之夏亦終身隱處或勸之出輒不應

房廷祥字發公三原人年十三補博士弟子父建極崇禎辛未進士官於晉遷兵部主事歸里會李自成盜關中建極知國事孔棘星馳入都時廷祥年十五請從母不許廷祥泣告曰父死國兒不當死父乎遂裹糧易服爲少黃冠以從至河阻賊不得渡乃涉洛躡王屋太行諸山匍伏行數千里甲申四月抵近畿聞京師陷建極將絕粒死廷祥泣請曰吾父今道死窮山中誰知者且死亦何益因強輿歸未幾卒廷祥慟不欲生既葬廬墓側

不去僅得下毒以歿

來淑泗字聖濤三原人年十歲值流寇變扶繼母左氏避難訛傳
寇至母投身井中淑泗號泣井上跪求途人覓綆縋救乞人負
歸閭里稱為孝童

李時盛字文吾三原人性至孝懋遷於外因母寡居棄歸養母澣
衣滌器皆躬親焉明季有舊交高姓者以黃金五十兩寄其家
商於外值闖亂焚掠時盛家室不保閱七年而高至悉取還之
高為感泣入頌其義

申培棧字林蒼三原歲貢任兩當訓導性孝友父歿維揚徒跣扶
櫬營葬盡哀事後母委曲承順所生弟妹撫誨婚嫁悉殫心力
嘗捐金代宗族輸稅至于周貧濟困掩骼埋胔尤為好行其德
劉容三原人農家子也居岷峨之麓與弟俱入山虎至懼弟去

追及左手挽其尾據其背右手執履撻之虎益猛容益力虎乃置其弟去容負歸得蘇

梁澂之字靜海三原人倉場侍郎鉉庶子也幼時常從宦四方父以果餌賜之輒念曰吾嫡母在家未食也因泣下聞得純綺輒以請於父曰吾將爲嫡母衣也以是戚屬咸稱其孝後歸省嫡母適患痢粒食不進澂之減餐泣禱曰吾母食始食越翌日果瘳性好施解衣推食無德色竟以嫡母卒過哀致殞士林嗟之劉守法守富守奇俱三原人兄弟友愛至老無間同爨經五世縣令表其門曰百忍同芳洋縣王奇瑾崇禎癸酉舉人知東鹿縣亦五世同居又鄠縣樊邦彥四世同居高陵裴汝清三世同居皆無忝公藝家風者

張厥蓋厓人順治四年山寇金龍破其堡况臘被殺并掠厥子靈

哇以去厥念兄止此子今被掠是無後也即負己子補哇入山
易靈哇以歸冀圖往贖之資未果值寇移營以補哇幼不能從
行遂殺之後厥亦復得子云

郝振綱富平人太學生少失怙日侍寡母慟含泣讀書值歲荒日
鬻線易米爲食既長優於幕學所至必奉母以遊族孫信七歲
家貧度爲僧振綱養之得成立又族孫仕有忤行振綱今從已
日夕觀事母狀閱三載仕感悟請歸事母族人有夫婦同逝者
葬之而育其嗣母疾篤焚祝求代及卒哀毀廬墓者三年雍正
五年旌表

孫文達富平人產於滇年十歲父歿盡哀遵所生母訓讀書入泮
不知原籍有嫡母在也雍正二年富平令移文到滇乃大慟遂
扶父柩奉母携妻妹萬里歸秦脩極艱苦以久缺嫡母養育不

自責晨夕竭力以事二母遇外侮槩不與較曰恐傷寡母心耳
雍正四年旌表

唐文昭字含章富平諸生父歿齋居三載繼母偏愛己子因逐昭
昭肆力稽古益明理數之學順治十年御史何承都造其廬贈
以金却之贈以布辭不得因爲母壽母卒悔悟呼歸居常困於
貧每竟日不舉火歲侵邑人重其學行斂粟贍之知縣郭傳芳
創祠祀孝義三人昭特與焉

党國虎富平人六歲母亡寄撫舅氏父普寬兄廉生爲族子國孝
歐死以事未露國孝倖免國虎恚甚搥力弱未能報順治九年
國虎年二十一乃誘國孝於野並其子尋兒搥殺之詣縣自首
赴獄縣令欲加矜恤國虎念父仇已雪遂於獄自經死與唐時
梁悅事正同知縣郭傳芳創孝義祠首肖像祀悅而以國虎配

之

孟孔脉字祖尼富平人順治乙酉舉人授稷山令聽斷明允邑無冤抑嘗割俸贖民鬻子百餘人富邑陰家河病涉捐貲築石橋以濟行旅又築堡寨聯守望里黨賴之

趙一韓富平諸生性醇謹親老多病藥必先嘗及歿哀毀時立鄉人稱之兩事繼母無異所生待諸弟友愛無間言以子述麟巡撫鄖陽贈都察院右副都御史

南爾強字遜之安定廩生有至性六歲喪母方斂慟幾絕父撫之曰汝爲死母獨不爲生父乎哀稍輟既殯朔望必至荒郊晨拜事繼母尤篤孝諸季欲分爨罄產讓之父士達將就廷試積貲三十金一夕被盜去復稱貸以進不令父知盜感愧還金遺之去終身不洩也父卒尤孺慕不哀雍正九年題旌從弟爾強

長民性孝謹事親色養由生任金縣訓導

史秉鑑字敷平安定人明末盜起父仔耀州學正秉鑑馳省途遇賊泣告曰吾往省父願見父來就死賊釋之父歿爲諸生始食餼曰此天家所以造士也以佐菽水之資可乎仍率諸弟子力耕以奉母以外大父無子復迎養以悅母志一門之內融融如也每出行經溪山崖谷必下車騎曰母命也其舉念不忘多類此年七十由歲貢授渭南司訓垂十年還里舉鄉飲年九十乃終雍正十年旌表

石又賢安定諸生家貧甚幼時過里塾聞誦書聲輒欣然不捨父異之令從舅氏學初授以孝經退輒語人曰吾能是及長弟肖先方五歲輒呼至學中同卧起告以懷橘扇枕等事弟一日觸母怒戒之曰吾語汝謂何弟大沮悔由是不敢復忤母母亡歿

甚父亡毀逾甚得咳血疾時肖先已前卒又賢知不起語家人
曰吾兄弟繼逝不獲親視窆穴俾吾父有子而無子天乎何酷
言訖而終聞者皆掩涕雍正十年旌表

郝秉秀字挺生安定人年七十事母孝謹晨昏必趨拜膝下母止
之每日晨起必屏氣肅容向母戶叩祝母壽又貢生南瑤字馥
蘭五歲即解定省禮父歿事母務得歡心撫孤姪尤篤鄉人稱
之子源澄源漪亦以孝聞

李桐安定人孝友子諒鄉黨著聞父母年俱耄耋桐終身孺慕不
衰友于尤篤每事必肩其難者季弟早世桐撫其婦子衣食必
先孤寡而後已

王璉安定人九歲值母病湯藥必親夜不假寐母卒事繼母尤恭
謹母子俱有令名教子姪以孝經小學爲根柢闕史鑑得忠孝

大節及陰德事則手書一編示之其他敬老慈幼敦族睦隣尤篤行君子也

楊方安定人康熙辛酉舉於鄉授長安教諭性孝友弟正病股者三載母念弟不能遠離欲挈弟至長安慮方不能兼顧因不至方命妻子奉母於家與弟至學舍訪國醫治之藥餌俱親調饑飽寒煖樽節之如嬰兒見者咸爲感動聞母喪即日就道諸生追唁不及搢紳間尤重之

李恭乂宜川人康熙丁丑進士父歿繼母他適遺弟妹六人撫視如一既長婚嫁俱成禮仲叔兩弟復早逝遺孤歲餘又撫之克底成立同居共爨人無間言通籍後家居杜門尤恥干謁惟來學者不拒終浙江景寧令

王光印延川生員母病劇醫者不審其症光印嘗糞以察之復瀉

香告天願以身代母病旋愈後享大壽卒光印哀毀骨立廬墓終喪

薛之奇延長人歲貢性至孝親病湯藥必親嘗及歿葬祭如禮撫幼弟終身友愛不倦瞻族周親恩意懇摯官湖廣衡州府通判廬點鳳翔人性至孝事親色養兼至歲饑負米漢南甘旨無缺父遘疾日侍湯藥祈以身代事繼母祝無異所生雍正六年旌表弟熙康熙己未進士年十三喪母悲慟欲絕事繼母祝以孝稱官翰林院檢討

王大利鳳翔人事親孝家貧赴川生理及歸而母已歿大利葬母後即以家產讓其兄躬自廬墓鄉黨稱之

蹇逢吉岐山人官撫標守脩遭寇變父被掠逢吉罄產贖之不得語人曰活我孰若活我父乃給賊家有埋金願質已釋父

以償父既脫賊覺之害言於青峯山下聞者莫不流涕焉後旌表

董成梅寶雞人入國學事親養志居喪尤哀毀逾禮侍兄疾湯藥必親嘗歷久不懈族叔嘉言歿旅舍爲歸櫬營葬族弟舒績遭歲歉流移他所成梅給貲營運家室復完康熙辛未壬申陝大饑成梅捐粟出賑又勸諭親黨素封之家協力捐輸分戶散給鄉人賴舉火者甚衆郡邑聞其行義歷舉鄉飲正賓雍正九年奉

旌表

劉元昌麟遊人官白河縣司訓流寇破城父被拷掠至死元昌痛父死於非命哀毀終身事繼母尤克盡子道鄉里稱之

呂夢熊麟遊學生母老失明每早起盥洗爲母舐目飲食手供親

滌溺器起居不離左右遇宴會必懷菓核歸以奉母母壽八十
八歲

何文元麟遊學生父歿母遭疾危篤感異夢起禱土主廟燃一指
和指灰入藥以進母病旋瘥更善事祖父母人稱其至性過人
又公孫浩者母疾篤割股以療母遂愈亦麟遊諸生也

張東生褒城縣諸生五歲喪母事繼母李盡孝值寇警東生負母
避亂脩歷諸艱險平時菽水尤能色養

張拱極城固貢生母病侍湯藥三年衣不解帶晨昏祝天願以身
代母病愈爲朝邑訓導一年以憂歸遂不復仕年九十一卒

梁天植城固人明末父衡爲逆賊所執家人竄伏天植追隨不釋
既而乘間脫父入山谷日負其父行數十里卒免於難後舉順

治乙酉科鄉試

趙元惺城固人父京仕官京師值寇亂家人咸被執母楊年六旬賊索餉加以炮烙元惺哀號乞代賊令牽出將殺之元惺引頸就刃無懼色賊義而兩釋之

夏錫攸城固人傭身養母母病篤日夕祈禱願以身代延醫治藥潛割股和藥以進翌日母病愈

方振寰城固人與弟諸生耀寰素友愛家人或議析居兄弟相抱而泣自是中外弗復言耀寰妻張氏中丞鳳翽女凡飲饌衣服必先夫之兄嫂而後已尤人所難

彭效古西鄉人善事繼母以孝聞申請旌異

張永福西鄉縣民性至孝四歲失怙母李氏撫養成立以貧故負薪易米事母惟謹人憫其孝助貲貿易時覓蠅頭以佐菽水終身無一日離母也又楚人姚必聞以招墾與母至西鄉母病篤

割右股以進病遂愈人以爲孝感

康紹文興安庠生順治三年流寇陷城父子俱被掠賊欲殺其父紹文乞以身代賊殺之父竟免於難

康應祥興安州人家貧好義嘗路拾黃金六十兩俟失者還之一日糴麥歸麥中得白金十兩亦返其主事繼母以孝聞順治三年流寇過其門曰此孝義士也相戒勿犯

覃訓紫陽人少孤事繼母宋至孝待繼母弟誨極友愛土賊竊發訓負宋避難誨稍後爲賊所獲訓傾財詣賊求贖卒歸之生平修橋梁施醫藥里黨咸利賴焉

許應選紫陽人韋雲蒲城人母病目皆失明醫藥罔效二人朝夕籲天號泣母目忽明人以爲孝感應選以諸生居鄉尤樂賑恤窮乏有不能庀喪葬者恒加扶助

同蒲壁商州人康熙己酉以第一人舉於鄉壬戌成進士改庶吉士授檢討念不得養母請告歸飲食湯藥咸親嘗母歿遂絕意仕宦屢徵不起兩女弟家貧賙恤倍至視從兄弟如同懷督課從子多所成就擇族人之方正者舉爲族長身率子弟受教居鄉慎言笑嚴取與讀書樂善泊如也會州牧修明文廟祀典力爲贊襄易木主刊儀注至今奉爲程式卒之日遠近執紼者千人

盧運熙商州人幼失怙族伯廷詔無子收育之遂嗣焉年數齡即嗜學崇禎癸未城陷羣兒被擄俱焚死運熙獨手持孟子一卷賊異之獲免事嗣父母盡孝暨歿哀毀盡禮有從伯無子者事之如父康熙辛酉舉於鄉壬戌赴禮闈忽心動兼程歸伯已寢疾及卒庀喪葬尤盡力又族弟少孤隨母改適訪得之令歸宗

俾娶妻成立族兄老而生子及卒運熙嚴課之得列庠序嘗建乳來社與鄉人講學課藝所造就尤衆

王孝風鎮安人事母至孝冠至與族弟各携家避亂事急弟棄其母負妻去孝風獨棄妻子負母逃匿亂定孝風奉母歸妻子亦無恙其弟及妻竟遇害

陳國柱鎮安人性至孝家貧無以爲養投充行伍所得餉悉供親膳或招之飲必先爲父母設饌務極豐腆國柱目不知書其愛敬蓋本天性云

孟三光鎮安人少孤事母盡孝母失明扶掖不離左右家赤貧甘旨無缺年踰四十母怒輒長跪受杖里黨賢之

曹亨鎮安人年十一母死不能具棺號泣於路乞鬻身殮母之金歸葬畢即詣其家執役終身不改

李嗣蕃雒南諸生通經學工古文辭值寇亂父果珍遠宦撫寧嗣蕃奉母避寇山中卒保無恙果珍攝京兆值甲申之變被寇虐幾死嗣蕃諱子稱僕囚服橐餽免父於難以勞勩得肺疾日就瘠羸後侍父權稅邳關歿於邳果珍崇禎丙子舉人居家孝友授撫寧令奏免缺額賠賦及定攢槽養馬之法歲省萬金署清豐流寇袁時中陷開州果珍單騎直前諭以大義賊遂解又爲開州殘民請蠲請賑後皆得請歷贛州府知府

陳顯耀山陽縣役順治三年流寇劉二虎率衆自楚入商犯山陽城制府大發兵剿之賊偵知宵遁邑令趙廷臣偕數十騎探寇至土橋倏遇賊衆役咸鳥獸散顯耀獨挺戈衛廷臣俄一賊起草中奮稍傷廷臣右股奪其馬更刺廷臣顯耀力救得免賊去負廷臣登山匿榛莽間裏其創升高望賊見賊大至懼我兵乘

其後俱疾走顯耀尾賊大隊且追下山奮呼而前賊謂我兵至益駭潰顯耀橫刺一賊墜地因奪馬飛騎掖廷臣馳歸後廷臣官浙閩總督招之赴浙顯耀卒不往

苟復字元煦山陽庠生明季流寇陷商州復父日躋罵賊遇害復遍覓父屍以殮將葬甫及壙遇賊數十騎突至衆悉奔避復守棺痛哭賊問棺何人曰父也問何不逃曰寧與父同死耳又一賊後至謂復曰可速葬少遲則大隊將至蹂躪靡遺矣呼衆賊助葬訖令急走且問何姓氏具以告後商洛道許宸按部亟訪山陽孝子苟秀才復往謁許甚敬之蓋後至賊爲許家僮陷賊中後脫歸仍事許嘗爲述此事顯末云

劉緒岱字宗岳山陽歲貢生明季流寇掠山右父必達爲汾陽令被害緒岱聞警馳至求屍不獲寇方追捕必達家屬緒岱念已

死如父骨何因潛歸明年寇定即徒步抵晉瀝血呈請臺司願發義塚認父骨臺司允之累滴血無一沁者緒岱徬徨莫措一里老欵獻云迤西關聖祠後置一棺上有墨字盍驗之緒岱即馳視所書面髮身色殊似父急啓棺刺血三滴俱沁入無痕時觀者如堵皆泣下緒岱亦僅餘一息即置棺衾更殮歸葬舊阡父忠子孝時論重之

蔡光先山陽庠生七歲喪母四事後母皆盡孝晚母生弟光祚甫及週父死光先曲體母意愛弟極篤比長親爲督課更延名師訓誨光祚得入庠康熙十四年吳逆僞將屯縣境城陷室廬盡毀光先負弟遠避歷盡險阻卒保無恙

劉運惇同州生員曾祖自德以勤儉起家事兄自明尤謹四傳至運惇昆季十人友于彌篤諸兄皆先逝運惇撫育諸姪不啻己

出且勗之曰吾家四世同心骨月依輔爾曹倘有乖離使吾無以見先人於地下也諸姪恪守庭訓益敦孝友迄今孫曾繩繩七世同爨雍正十年奉

旨旌表

加賜御書匾額時論榮之

曹如琯同州人性純孝數歲即解問寢視膳比長登賢書負米中州以供甘旨父病嘗糞以驗愈否與仲季相友愛無私財里黨多感化嘗雪夜憇別館有少婦奔之如琯急趨避里中妄人橫逆置不與校初任涇州學正州民聚衆譁於牧署牧大困如琯以義諭止之康熙丙戌成進士改庶吉士尋告歸

劉世澤朝邑諸生父裔山西廣靈知縣攝廣昌篆昌邑舊多浮派

裔申請捐除爲奸吏李承芳所害觀歸承芳漏網世澤痛哭

未白憤不欲生忽一夕不知所往家人以爲必從緇黃去矣世澤潛至廣昌歷愬臺司具得承芳罪狀

詔磔於市邑人感動仍相率建祠以祀其父世澤歸時年方十七薛國光朝邑人善事繼母母病國光禱以身代湯藥必親嘗衣不解帶者數月性好施與歲饑捐米助賑邑令姚士塾累旌其門雷王賓朝邑生員孝子捷之孫也執親喪期年不茹菜果三年不御酒肉居祠下朝夕哭奠如禮人稱世孝

張疇武朝邑生員天性孝友父歿哀毀骨立既葬廬墓三年邑令羅人琮旌其門又歲貢生王元灝居親喪生員張奠極居父喪布衣劉引禹居祖母喪俱三年不御酒肉既殯行廬墓禮

張雋班朝邑歲貢生家貧負米致養康熙辛未旱蝗雋班館上郡迎父就養父老不能騎以肩輿度嶺險峻輿夫筮釜不前雋

班自昇父山行數十里父爲嗚咽售班故示踴躍以慰父性友愛伯兄怒輒加詬杖售班恬然受之工文嗜學試輒冠軍邑令延爲義學師從遊日衆多所成就

侯樹屏字建侯邵陽人前壬午舉人授朔州牧遷廬州府佐未任以終養歸爲諸生時值流寇變起母雷適歸舅氏倉猝奉父走匿城中一夕聞舅若失守急詣邑令痛哭求啓門出令感其誠許之出遇賊泣訴以故賊亦釋之既至母先已殉節樹屏痛不欲生常以栗板書樹屏爾忘爾母耶七字置座右觸目揮淚數十年如一日其治朔也值姜瓖殘破後奉檄招集流移給房舍散牛具不二年墾地數千頃父在庠嘗採古名宦事實爲觀官錄以勗樹屏樹屏爲循吏蓋本庭訓云

子體健韓城人順治丙戌進士髫年父病每晨起必號泣於村社

各廟祈以身代衣不解帶者數月父母歿育於兄嫂登第後事兄如父歷宰武強龍陽俱著惠政

薛爾昌韓城人明大學士國觀仲子廕中書舍人年十三值闖逆劫兄爾章拷餉爾昌投賊自言願代答掠賊義之幽禁年餘脅之降不屈賊敗潛脫歸痛父慘死遂絕意仕進

國初益都孫廷銓在政府勸之仕謝以疎散不堪任職卒不出閉門讀書足不越戶外者六十餘年里黨罕識其面年八十八卒衛引嘉韓城人順治己亥進士闖逆入關徧逮搢紳索餉引嘉父之瑄叔之琚堂兄引文皆邑顯官悉被執將害之引嘉甫弱冠挺身詣賊願以身代備罹兇慘卒不屈知石首縣值山寇竊發城幾陷引嘉率兵民剿平之糗糧芻茭不煩問左右石首至今感頌經理家務五世同居課子弟必嚴皆爲令器族黨有好學者

陽江志卷之二十二
招至家塾或解囊助之多所成就

衛蓋臣韓城人闖逆入關掠蓋臣父先範索餉脩受慘毒蓋臣朝夕環泣兩閱月得間以其父逸歸其弟被誣繫獄親党勸爲自全計蓋臣不可挺身赴臺司反覆陳辨寃得雪嘗構龍門社學集子姓嫻黨嚴加督課邑中先後登賢書成進士者多出其門蓋臣亦以順治庚子舉於鄉

衛鴻韓城人幼隨父引文宦京邸年十三值闖變引文縑衣南下母張氏死之鴻扶母喪及庶母卞幼弟嵩齡西歸中途失弟所在抵家葬母訖即隻身四出誓不見父與弟不復還時南北路梗乞食以行後知父盡節維揚慟哭幾殞求屍不可得因招魂歸葬再出訪弟踉蹌道左歷四載至蘆溝橋旁遇民家子殊肖父叩之果然乞歸課讀歲辛酉嵩齡得舉於鄉族人有從父於

難者給田以贍其家周貧恤苦歷久不倦前後捐債焚券不下數千金鄉人稱其孝義後以明經授鎮原訓導不赴

閩和羹韓城人順治戊子歲貢任延川教諭性至孝父歿廬墓三年流冠刼掠人皆遠避和羹獨守墓下聞金鼓聲即伏塚哭曰兒在此父勿驚也

程毓槐韓城人順治甲午舉於鄉少失怙哀毀幾絕母病禱於神乞以身代值闖亂村人皆走匿毓槐母喪在殯與弟諸生毓檀守柩下不去賊至刃脅之毓槐與毓檀爭就死賊重其孝友勿殺也後過其村曰此程孝子莊戒勿犯所居西川里當韓城孔道山徑崎嶇每霖雨輓輸不至毓槐毓檀捐貲開鑿韓人賴之又西川土瘠民貧絃誦多廢毓槐毓檀爲擇地建社學延師課讀鄉人子弟咸來就業嗣後科名鵲起二程培養之力居多

吉庚韓城人康熙甲午舉人五齡失父母有言及者即哭泣不食鄉黨稱爲孝童稍長事祖父母備極色養祖疾晝夜侍湯藥不少懈叔祖母孀居無子庚迎養有加禮叔父病養之如父暨歿撫孤弟恩意尤曲至庚少有文譽試輒冠軍邑令康行憫延邵陽康乃心修志庚採訪商確之力爲多

解光紳字公垂韓城人以明經任府谷訓導性至孝事親先意承志無私蓄父患瘍卧床累月不能轉側光紳晝夜扶掖不離左右中夜執香泣禱香盡熱指不覺也禱畢瘡旋愈數年後父歿事母尤盡孝居喪苦次三載以伯兄光纓死闔難言及輒涕泗交頤與仲季篤友愛動必與偕爲諸生足不履長吏庭工書學旁及子史試必冠其曹任府谷日砥節礪行文廟祀

之

強敬業韓城人性孝家貧經商爲養脩極勞苦父病疫日侍湯藥
累月不怠及歿營葬不半載鬚髮盡白祖母卒叔不能襄葬事
敬業一身辦之撫幼弟極友愛比長析產或云爾產爾自有之
弟不望均分也敬業曰手足一體敢二視乎毋撓我歲庚子韓
大饑念庠士苦寒又不敢居販士名私以百金付學博散給貧
者居恒謙謹不慢一人人有犯婉詞謝之不與校人亦多自愧
云

董士孝韓城細民家酷貧傭工爲養嘗走遞文書得值悉奉父母
母病祈以身代嘗冀驗愈否天寒懷父足以坐夜必身先溫被
辛未大饑不能舉火恒賃傭以供父母不使父母知也

張京瓚韓城人康熙丙午舉人事親先意承志事姊唯謹篤友誼
有同年寄葬先人於韓者歲必詣墓下代爲祭掃辛未蝗災捐

穀數百石以給親族不足更鬻產濟之宰慶都民貧恒苦乏食京瓚力請發穀麥以貸歲荒復緩征又捐俸置學田供士子科舉費蒞慶十餘載士民刊實政錄以誌其德

張顧行韓城人康熙丁未進士顧行幼出嗣奉本生父母盡孝生養死葬皆身任兄弟多早卒為營喪葬撫從子孫恩義尤篤業師許某家貧顧行餽遺數十年無倦師客死中州經紀歸殯故阡壬申關中大侵顧行歸自黔陽遇流離滿路施賑無虛日抵家即毀飲器典衣物妻薛氏脫簪珥佐之得千金糴粟散賑全活甚衆自朗川令歷貴州學政廉明特著擢江蘇糧道未數月以憂歸

陳九疇華州人性孝友事繼母屈氏承歡四十餘年屈忘其非已出也與異母弟九錫相友愛盡以美田宅讓之矣又

巡檢卒於官九疇逮涉爲扶櫬葶眷而歸撫其子女俾立室家有至戚醉後墮井死其家疑素有隙者害之將藉九疇與構難九疇力辨於官遂得釋初湯斌分守潼商高九疇行義與友善及卒爲銘其墓子邃如康熙甲辰進士授海豐令以目疾解組歸當明季闖變邃如挈家避居柳鎮比時杆賊嘯聚邃如築堡固守賊不能攻保全甚衆里人德之

杜進華州生員敦孝行事繼母曲意承順四十餘年人無間言父歿值歲歉喪葬盡禮妹少寡養之終身爲撫孤成立族孫如松未及週而孤爲經理其家比長訓以讀書如松入庠俾其節母得邀旌典族弟有孤女同州富豪設謀強聘進力遏之爲擇配以嫁隣人母誤服毒或誣其子大逆將寘極典子懼懷金求救進叱去仍力釋之得不寃進年九十有六舉鄉飲介賓

李棲鳳字羽伯華州生員父早卒事母至孝母疾湯藥必親嘗及卒哀毀骨立先是父歿時弟喬甫歲週棲鳳撫育之屢經離亂悉力保護喬稍長教之讀書補郡諸生受室分產友愛愈篤又性好施與嘗捐粟賑饑里中共賢之

劉誥字謹軒華州人事親孝誥兒時即凝然不羣束髮受書撫採百家尤篤嗜忠孝經親歿泣血居憂終喪無嘻笑容先後廬墓六年每歷辰午戌三時親戴土封墓即寒暑弗輟也州人楊耀世事父母喪葬盡禮先後亦廬墓六年蒲城劉士信幼孤事母至孝母卒廬墓六年始歸

孫蒼華州人康熙初年十七隨父應禮樵西石門虎突至攫其父蒼奮呼而前揮手中斧裂虎項虎逸蒼父得脫歸數月瘡始瘳父常袒瘕示人相視皆戰慄或詰蒼曰汝斫虎時母怖乎曰

時不知所畏今延思始覺可怖耳其天性純篤如此

主讀字啓吾華州人父仕俊好遊不知所在讀三歲養於祖父母年十三祖歿葬畢必欲踪跡其父之太和山之郿縣清風山又之峨嵋山遇老僧詢讀有祖母在慰之曰汝尋父爲盡子職耳父不可得不若代汝父歸事祖母讀乃歸事祖母盡孝所居室內外遍書色難二字或遺以李密陳情表讀朝夕泣誦後祖母得年九十二而卒讀孺慕如初

楊長華陰人歲荒乏食嘗負粟隣境忍饑奉親家貧卧無衾褥嘗身先溫席抱父足竟夕父病祈以身代且嘗糞以驗瘥否父卒哭盡哀不食數日葬後廬墓側朝夕環塚守視事之如生康熙二十年旌表

蘇億華陰人純孝性成六歲知問寢視膳七歲喪母哭泣至慟水

漿不入口者數日後每過墓門必慟哭事父愉色婉容歷五十年如一日父疾嘗抱坐懷中七晝夜無轉側隨父寢處三十餘年父歿既葬戴土成墳廬墓側三年雍正五年旌表

蘇昌隆俊隆興隆俱蘇億子孝行純篤能世其德母歿三人皆哀毀骨立既葬晝則力耕養父夜必更代居墳以伴母後父歿爭負土築墳兄弟並廬墓側親朋以家無長丁勸興隆歸守父業兩兄亦促歸興隆不入室依主而卧者三年邦人過其墓嘗見白蛇守墳咸謂純孝所感雍正五年並旌表

王弘嘉字玉質華陰歲貢生性醇篤親歿水漿不入口三日值親忌率子弟更衣冠拜獻主前輒淚涔涔覆面其終身慕如此生平讀書砥行尤工行楷書法

李馥蒸字雲伯蒲城人前癸未進士歷江西提學道性孝友執親

喪廬墓三載所遺產悉讓弟歲饑出家財糴粟平糴全活甚衆
蒲邑遭王永強之變暴骨遍野爲捐金立義塚瘞之故友王御
史道純死闖難於山西不遠千里携櫬歸葬

李承引蒲城人性篤孝初娶婦偶拂姑意即出之設義學塾師及
諸生膏火悉以身任塾中多成名者好施與周貧恤苦無虛日
嘗居肆偶出或竊其錢比舍攢擊之承引至曰我令彼來取勿
毆也其人感悔易行除夕有隣人盜其麥遇承引訴以養母因
倍給錢米遣之歲己丑王永強叛兵至蒲承引業避城外復入
負先人遺像並木主以行時城閉不得出聞空中呼曰東南隅
走者三因越城得脫

王凝祚蒲城人幼有至性父汝璜明末任河南息縣丞卒於官道
阻未能歸櫬順治初凝祚辭母東行至潼關足蘭不能前卧旅

舍夜夢老人摩足令起次日大愈即星馳至息負骸歸葬事祖
父母及母俱色養無缺姪毓俊幼孤撫之如已子及長事凝祚
稍不謹勿校也

許仲盈蒲城人父歿廬墓三年母疾醫藥不效默禱於北辰願以
身代兄早卒孤寡依仲盈爲生卒撫孤成立歲荒設社倉宗黨
全活者甚衆

宋希寅蒲城人家貧未學性篤孝瓦盆脫粟奉養必至常買繩易
餅以供膳父母相繼逝既葬希寅守塚三年穿土穴爲居掘草
根以食幾至滅性既釋服衆強之歸每登城望墓輒長號泪盡
不已嘗見其父儼然在寢旋出門疾追至墓下訖不見又嘗恍
惚見母來臥室牽衣而哭亦行至塚畔相失因慟絕野老爲昇
入土穴逾時始甦先是希寅獨居土穴時有犬重鬣赤睛

旋繞不去又有兩狼日踰墓上馴若雛落間物又嘗於墓側種瓜烏啄隣田瓜而希實瓜獨無一損人皆謂至孝所感學使高爾公造其廬禮之爲作宋孝子傳

屈琚字珮玉蒲城人少好讀書嘗負笈從盤屋李顥郿縣李柏遊二人皆器重之歲辛未闕中大饑琚館於鹿邑因携家就食父疾卒琚痛幾死先送母歸蒲復至鹿邑扶父櫬徒步往來晝夜號泣不絕聲歸葬畢竟以哀毀致殞

雷鐃字劍華蒲城副榜貢生少好學工古文辭性篤孝友執親喪哀毀骨立所遺產悉讓兩弟僦居數椽啼號不絕意恬如也季弟客死山左聞訃慟絕以歸骨爲已任踉蹌衝雪而行既至爲人傭書得金始扶櫬歸葬

雷鐸字伯覺蒲城人康熙丙子舉人性孝事繼母尤謹值歲歉負

米他郡嘗終日不食不致母缺於供母病禱於家廟願減筭益母壽家雖貧兄弟姑姊之貧者恒迎養不絕偶見同宗孀婦携幼子行田畔即聚族人議曰族中少婦出行吾宗黨之責也倡衆議給薪米婦遂守節終身性好學嘗嚴冬就月下讀楚辭邑令助以膏火不受有府司馬攝蒲篆丁祭不至鐸抗詞爭之署令即馳至如禮四時家祭竭誠盡慎不以貧故少怠朔望聚族人習禮講法定例言二十條族人恪守之

原進長蒲城人幼失母祖母董撫育之祖母病卧床進長朝夕事奉藥餌必親七年不懈事父愛敬交盡居喪不離苦塊既葬迎主歸朝夕哭奠歷三載如一日

原文彩蒲城人父永貞晚得瘖疾卧床五載文彩傾貲求醫百計不怠及卒喪葬盡禮遶墓號泣不能歸因廬墓側嘗曰吾父

性多畏今適中野不更畏乎用伴朝夕無使有畏而已永貞力學好著述有小學人初考十二卷歿後文彩爲乞序以傳

劉鳴珂字伯容蒲城諸生性孝友居貧養親極先意承志之樂與人交尤重氣誼故人屈琚歿母老無依有弟又不知所往鳴珂力爲營葬并覓弟歸以養其母西和李重丙少年不偶因延致于家俾就讀後得爲知名士蒲令汪兆鼎聘修邑志有富人挾重貲浼爲伊父作佳傳卒不許初鳴珂父襄謨友愛諸姪撫育如已子及卒呼子鳴珂玉珂諄諄以同居爲囑今總服同爨食指六十餘人無間言皆襄謨遺訓也玉珂康熙辛卯舉人性行肫篤如其父兄

王發祥耀州廩膳生孝友性成以父淑景兄肇祥並死闔禍終身不飲酒茹葷不御內哀思痛悼無間歲時暨死猶泣然曰吾今

而始得見吾父吾兄也聞者盡流淚下

宇文澄武功人少遭母喪哀毀等成人事父及繼母俱孝養不衰父老多病親奉湯藥者十餘年夜必侍寢父歿喪葬悉中禮哭過哀成疾而卒未卒前其弟死無子嗣以已子哭而言曰吾不早爲弟後者望其生子耳今已矣聞者無不泣然雍正八年旌表

李倬武功生員高祖栢好施與敦義讓五傳至倬皆以孝友長厚著聞鄉里倬克承世德醇謹自持教子孫以孝弟其子孫亦克守家法親遜和睦同爨歷七世食指九十餘人雍正十年建坊旌表

特頒宸翰以示獎勵

標漢武功人父歿哀毀逾禮事母楊尤盡孝薄田躬耕晨

志母歿方在殯會大雨水漲欲漂其柩襟漢伏柩號呼水頓減
得無恙先是會城有關中書院明馮恭定從吾講學所也西安
守葉承祧遴取屬邑諸生入院襟漢爲舉首以親老懇辭不就
同邑馬鳴秋者亦葉守所拔士入院肄業一日忽心痛即星馳
抵家則母於昨午抱微疾問家人吾子何日當歸正鳴秋心痛
時也其誠感如此鳴秋樂善好施尤篤於親族士林重之襟漢
增廣生鳴秋歲貢生

馬之騷武功諸生義烈性成族姪璪爲永嘉令值耿逆叛閩中逆
黨祖弘勲自溫應之璪不屈死璪子逸姿年尚幼之騷適在署
挺身挈逸姿至璪死所枕屍而哭賊怒欲加以刃或曰此義士
也釋之遂護其喪而歸同璪死者爲溫處道陳丹赤其妻孥亦
賴之騷保全

第五憲文三水歲貢生性至孝幼喪母哀毀如成人父歿事繼母尤盡子道弄雛舞綵母忘其非已出也歿後廬墓三年歲時薦祭恒泣慕不衰

賈文耀字彬彬淳化人幼隨父我琪居西安闖賊陷城舉家竄散文耀年十八冒鋒刃徒跣雨雪中負母任氏還淳未幾土賊郭君振破淳執我琪文耀請以身代不許縛至石門山復號泣求贖乃釋我琪囚文耀歷二載賊首憐其孝稍縱之得間逃歸父母皆無恙漫勵志讀書餼於庠貢入成均

葛俊字前山淳化人少失怙恃養于外大母趙趙素封欲以為嗣俊念祖父宗祧辭之明季徭役煩苦里多流亡經營賠累人稱長者歲荒糴粟以賑隣族人皆德之子崇明性篤孝髫年母病親侍湯藥嘗糞知不起即晝夜號泣不止俊歿崇明年五十

哀慕一如喪母時釋服日過慟一仆竟卒

劉名翰長安人幼育於伯父母及長充淳邑營卒遂隸淳伯母病思食肉名翰向天默禱剖股爲羹以進病立愈邑令文秉濂聞而異之獎以殊禮

董明庠長武人性至孝母疾割股煮藥以進不令人知或問股何疾謝以他辭母疾遂愈邑令陳所抱旌其門

李天隆鄜州生員父成秀有疾天隆割股和藥以進父疾遂愈

劉宏譽洛川生員失怙善體母志母聞城北門將圯問狀遂終身不由母念姊及隣媪家貧時時饋遺不缺又季姊早寡請同居贍之母疾醫藥罔效忽思黔婁事竊嘗糞告醫者曰糞極苦可治願更調藥病果愈以歲貢授咸寧訓導

劉克定中部人天性純孝方七歲流寇執其祖克定號泣求代賊

義之遂釋其祖父禪令河南登封罵賊不屈死克定年舞勺徒步千里外扶柩歸葬以明經授靈武訓導

劉夔中部人順治二年賊丁崇福等作亂擄父入深山夔竭力贖之不得乃號哭於軍門誠動三軍遂擒斬渠魁八人保父以歸梁師舜字虞天中部人事總母甚孝流寇李老才之亂師舜負母逃難歲歉鬻子養母及歿寢苦枕塊三年不入內室食不成味禪後乃葬切切有餘哀

劉鼐字子鼎中部人年九歲隨祖母及父山行遇虎父以身蔽祖母鼐以身蔽父虎退而去十六歲父亡母病鼐日侍左右謝絕人事嘗曰人生應世之日長報親之日短况母老染疾可外出乎其純孝如此

楊琮中部人五六歲時見人毆其父輒泣跪求免人以爲偶然耳

試之哀乞如故又執兵刃戲刺其父琮即以身迎刃護救十五歲父患癰疾醫藥罔效遇一道人云大蛇和藥可起時祁寒琮仰天哀禱忽見一蛇入穴中掘之果得大蛇和藥以進道人曰藥後糞味可驗琮即嘗之以告道人賀曰生矣皆爾孝心所感也

劉克念字修吉中部廩生善事母居貧自得意氣適上曰貧何負於我而自卑耶妻李氏亦同志後克念病革囑氏曰吾性剛忤物以有今日之貧此呱呱者將何賴氏慨然曰君負才不偶遺二子以清貧足矣吾當教子成立以報君于地下克念亡氏年二十三歲歷三十餘年卒

馬允綏德諸生有文名闖逆陷西安欲授以偽官允抱先人木主逃寧鄉山中賊怒索之兄企被掠死會

王師至免獲免家貧甚兼值兵荒兪一意奉親已粗糲恒不飽師友招之食不就也親歿時年幾七十既葬廬墓三年曠野嚴冬每伏塚哀號手足俱皸瘃雍正九年旌表

高如玉葭州人親疾傾產以事醫藥居喪幾至滅性伯父某年邁無子宦遊不歸如玉具貲迎養及歿營葬如禮弟早歿遺孤方幼撫之如已子州南譚家坪地濱河最稱沃衍河身適當窪下不能行地乃捐金集衆鑿石引流以資灌溉州牧孫毓奇等重其行義聘主義學如玉以師道自任生徒蔚起雍正九年旌表李在淑葭州人幼孤事母至孝母歿哀思尤終身不忘初赤貧及壯生業稍豐咸屬婚喪有不能自贍者必傾貲周恤兄子若琮卒官一姊一妹俱貧寡在淑撫諸甥姪不使失所嘗刻朱子家訓及經驗良方等書行世語人曰此先慈遺命也其善則歸親

類此雍正九年旌表

